

越史畧

欽定四庫全書提要

越史略三卷不著撰人名氏紀安南國事上卷曰國初沿革爲趙佗以下諸王曰歷代守任爲西漢至石晉交州牧守姓名曰吳紀乃五代末吳權及其子昌岌昌文等事蹟曰十二使君乃昌文沒後牙將杜景碩等爭立事蹟曰丁紀則丁部領以下諸王曰黎紀則黎恒以下諸王中卷下卷皆曰阮紀則自李公蘊得國後諸王事蹟紀述特詳惟以李爲阮與史不合案黎則安南志略稱陳氏代立凡李氏宗族及齊民姓李者皆令更爲阮以絕民望則此書當爲陳氏之臣所作前志又載陳普嘗作越志黎休嘗修越志俱陳太王時人太王者陳日

張之諡則此書或卽出普休二人手未可知也安南自漢迄唐並爲州郡五季末爲土豪竊據宋初始自立國此書自唐以前大抵全襲史文自可部領以下則出其國人之詞與史所載殊有同異蓋史臣但承赴告之辭故如薨卒之類往往較差一年至名號官爵或祇自行國中而不以通於大朝故亦有所錯互其牴牾之處頗可與正史相參證又史稱陳日尊自帝其國尊公蘊爲太祖神武皇帝國號大越此書原題大越史略蓋舉國號爲名而所列公蘊至吳昌八王皆僭帝號不獨陳日尊一代則尤史所未詳又玉海記交趾天貺寶象神武彰聖嘉慶諸年號此書皆與相合特所列黎阮諸王無

不改元者而史家並未悉載則必當時深自諱之故中國不能盡知耳書末又載陳曰昞以下紀年一篇但錄所僭諡號改元而不具事蹟其中所稱太上者以史按之當爲陳叔明其稱今上者當爲陳煒而史載曰昞至煒十二世此書乃僅得十世未詳其故又考廉州府志紀康熙十三年海濱得鐘題皇越昌符九年乙丑說者疑爲宋時李乾德以後僭號今此書稱今上昌符元年丁巳當明洪武十二年其九年正值乙丑則爲陳煒僭號無疑是亦足資考證矣安南自宋以後世共職貢乃敢乘前代失馭之際輒竊號國中至著之簡策以妄自誇大實悖謬不足採然吳楚僭王春秋絕之而作傳者

亦不沒其實故特依僞史例錄之以著其罪且以補宋
元二史外國傳之所未備焉

越史略卷一

四庫全書原本

守山閣叢書 史部

失名

國初沿革

昔黃帝既建萬國以交趾遠在百粵之表莫能統屬遂界於

西南隅其部落十有五焉曰交趾越裳氏武庫南越嘉寧

海陸海湯泉新昌平文文郎尤真山南懷驩九德皆禹貢之

所不及至周成王時越裳氏始獻白雉春秋謂之闕地戴記

謂之雕題至周莊王時嘉寧部有異人焉能以幻術服諸部

落自稱碓王都於文郎號文郎國以淳質爲俗結繩爲政傳

十八世皆稱碓王越勾踐嘗遣使來諭碓王拒之周末爲蜀

王子泮所逐而代之泮築城於越裳號安陽王竟不與周通

金山錢熙祚錫之校

秦末趙佗據鬱林南海象郡以稱王都番禺國號越自稱武
王時安陽王有神人曰皐魯能造柳弩一張十放教軍萬人
武皇知之乃遣其子始爲質請通好焉後王遇皐魯稍薄皐
魯去之王女媚珠又與始私焉始誘媚珠求看神弩因毀其
機馳使報武皇武皇復興兵攻之軍至王又如初弩折衆皆
潰散武皇遂破之王銜生犀入水水爲之開國遂屬趙

趙紀

武帝

諱佗姓趙氏漢真定人秦始皇三十三年已併天下略定揚
粵以任囂爲南海尉佗爲龍川令至二世時囂死以佗代囂
秦滅佗并有桂林象郡之地自立爲南越王漢高祖既定天

下遣陸賈奉璽綬往拜佗爲南越王漢高后五年王自卽皇帝位發兵攻長沙招撫甌駱閩粵皆屬焉有地東西萬餘里御黃屋左纁漢文帝立復遣陸賈遺書問之賈至王慚謝請復爲藩王長供貢職至漢武帝建元之年薨諡曰武帝在位十八年孫胡立是爲文王

文王

諱胡武帝孫也漢武帝時嘗遣子嬰齊入侍後王薨諡曰文王子嬰齊立是爲明王

明王

諱嬰齊文王子也初爲太子入宿衛於漢在長安娶樛氏女生子興及文王薨至是卽位立樛氏爲后興爲太子漢元鼎

四年王薨諡曰明王子興立是爲哀王

哀王

諱興明王子也初卽位尊母樛氏爲太后太后未嫁於明王時嘗與霸陵人安國少季通及卽位漢遣少季來諭王入朝太后復與少季通遂勸王入朝其相呂嘉數諫止王王不聽太后恐嘉不從置酒欲誅嘉嘉知之陰與大臣謀作亂漢武帝聞嘉不聽乃使韓千秋等將兵二千人以攻嘉嘉乃與其弟及國人攻弑王及太后盡殺漢使者迎明王長子術陽侯立之而諡曰哀王

術陽王

諱建德哀王庶兄也元鼎五年十一月其相呂嘉出兵擊韓

千秋等盡殺之函封漢使節置境上元鼎六年漢以路博德
爲伏波將軍出桂陽下湟水楊僕爲樓船將軍出豫章下橫
浦以歸義侯二人爲戈船下瀨將軍出零陵下瀨水馳義侯
因巴蜀罪人發夜郎兵下牂柯江同會番禺以攻嘉嘉及王
遁入海博德使人追之擒王及嘉時戈船下瀨兵未下而越
地已平矣遂分其地爲九郡南海蒼梧今梧州鬱林合浦今廣州
交趾九真今清化府日南今又安府珠崖儋耳今儋州

右趙自武帝至術陽王凡五主始丁巳終庚午共七
十四年而亡自漢武帝元封元年以後皆北人除授

歷代守任

石戴漢武帝時人

周章漢昭帝時人

魏朗子明漢宣帝時人

蘇定漢光武帝時人

馬援

後漢光武建武十六年薨泠縣人徵側雒將之女也嫁爲朱
鳶縣人詩索妻性甚雄勇所爲不法太守蘇定繩之以法側
怒乃與其妹貳起峰州兵攻陷郡縣九真日南皆應之略定
漢南外六十五城自立爲王都薨泠十七年漢拜馬援爲伏
波將軍以擊之十八年援緣海而進隨山刊道千有餘里至
浪泊上與側戰側不能支退保禁溪十九年側益困遂走爲
援所殺追擊其餘黨至居風降之乃立銅柱爲極界分其地

爲封溪望海二縣援又築爲繭城其圓如繭二十一年秋援還漢

周敞順帝時爲刺史

張喬

順帝永和三年象林蠻區憐反攻殺長吏以喬爲刺史喬至慰諭並皆降散

夏方

桓帝延熹三年九真復反拜方爲刺史冬十一月賊衆二萬餘人皆來降

劉操桓帝時人

周囑靈帝時人

朱儁

靈帝光和四年夏四月烏許蠻爲亂州人梁龍等因之以反有衆數萬人帝命儁擊破之以儁爲刺史

賈琮

靈帝中平元年州人屯兵執刺史帝以琮爲刺史琮至爲撫輯之州境乃安百姓歌曰賈父來晚使我先反今見清平吏不敢飯琮任事三年拜爲議郎

阮進漢中平中爲刺史

士燮

燮字彥威蒼梧廣信人父賜桓帝時爲日南太守燮少遊學漢東好左氏春秋爲之註解又通尙書大義父喪闋舉茂材

除丞令遷交州太守謙恭下士漢避亂者多往依焉獻帝聞其賢賜璽書褒諭以爲綏南中郎將領交州太守如故建安末燮遣子厥質於吳又以珠貝犀象及香果之珍美者遺孫權權嘉之封龍編侯弟三人壹鮪武並爲郡長燮旣學問優博又達於從政處大亂之世保全一方二十餘年疆場無事民皆樂業威尊無上出入鳴鍾磬備禮儀笳簫鼓吹闐咽道路嘗有數十妻居輜中當時貴重威震南蠻尉佗不足數也魏黃初七年王薨壽九十在治四十餘年孫權聞王死析合浦以北屬廣州呂岱爲刺史合浦以南爲交州戴良爲刺史以陳時代王爲太守王子徽等發兵共拒良後呂岱皆以計誅之傳首武昌

戴良吳人

呂岱吳人

陸允吳人

孫諶吳人

鄧荀

先是吳以孫諶貪暴爲民患故使荀督察之荀至擅調孔雀三十頭送建業民憚遠不去與郡史吳興殺諶及荀

吳興

霍弋

馬融

楊稷

劉俊

陶璜

晉武帝泰始三年孫皓遣陶璜等攻楊稷不克遂襲董元營
獲其寶物船載而歸以璜領州督璜又擊元殺之稷以其將
王素代元璜又陷其州因以璜爲刺史後璜見徵爲武昌督
時吳王已降於晉晉詔璜復其本職封宛陵侯卒璜在州三
十年恩威交著及卒舉州號哭如喪父母

吾彥代璜爲刺史

顧秘代吾彥爲刺史

陶威璜子

陶淑威弟

陶綏淑子

陶侃

晉元帝大興元年十一月詔加侃廣州刺史都督交州諸軍事

王諒

晉元帝永昌元年以諒爲刺史使收梁碩碩圍諒於龍編奪諒節諒不與乃斷右臂而取之諒死明帝太寧元年遣將軍高寶攻碩斬之

阮放晉成帝時爲刺史

阮敷穆帝時爲刺史

朱輔秦符堅時爲刺史

阮遜

杜瑗

晉孝武帝太元五年九真太守阮遜據州叛六年杜瑗斬遜州境乃平

杜惠度

瑗子也義熙七年永嘉太守盧循來奔攻破合浦徑向州治晉帝以惠度爲刺史惠度率府兵擊破之於石碕又與循戰於龍編南津惠度以雉尾炬燒其船夾岸射之循兵大潰循溺水死惠度取其屍斬之函首詣建康孝武帝初元元年七月林邑入寇惠度擊破之林邑乞降惠度爲政民畏而愛之城門夜開道不拾遺

杜宏文惠度子

王徽代宏文爲刺史

檀和之

宋文帝元嘉二十三年命刺史檀和之討林邑南陽人宗慤性好武事嘗言願乘長風破萬里浪及和之伐林邑毅然請行以慤爲振武將軍林邑王范陽邁聞軍出上表請還所掠地和之進軍圍林邑將范伏龍於區粟城宗慤擊破之五月拔區粟城斬伏龍乘勝入象浦陽邁傾國來戰以甲被象前後無際宗慤又爲獅子形以拒之象果驚走林邑兵大敗陽邁遁去二十四年和之還北

劉牧宋明帝時刺史

劉勃

阮長仁宋明帝時刺史

沈煥齊高帝時刺史

阮叔獻

叔獻長仁之從子長仁卒叔獻代領州事以號令未行求刺史於宋宋以沈煥爲刺史以叔獻爲武平新昌二郡太守叔獻既得朝命遂發兵守險不納煥煥停鬱林病卒齊高帝建元元年以叔獻爲刺史叔獻既受命乃斷絕貢獻永明三年命劉楷爲刺史以討叔獻叔獻懼間道還朝

劉楷齊高帝時刺史

房法宗齊明帝時刺史

伏登之

法宗長史也以法宗多病囚之別室而奪其權法宗好讀書在囚中求書觀之登之曰使君安居猶恐動疾豈可看書竟弗與齊以登之爲刺史法宗還過嶺而卒

阮凱齊明帝時刺史

阮嬰梁人凱叛嬰斬之代爲刺史

侯諮梁武帝時刺史

楊暕

初州人阮賁反據龍編城自稱南越帝置百官改元天德國號萬春梁武帝拜暕爲交州刺史陳霸先爲司馬以擊賁賁率衆三萬拒之敗於朱鳶又敗於蘇歷江口賁奔嘉寧城暕

進軍圍之賁奔之新昌獠中又率衆二萬出屯典澈湖大造船艦充塞湖中是夜江水暴漲霸先率所部兵隨流先進諸軍鼓譟以從賁不爲備因大潰退保屈獠洞病卒餘黨畏霸先兵勢乃舉衆就降賁子天寶入九真霸先舉兵討平之以九真爲愛州

陳霸先

以討阮賁之功授兵威將軍交州刺史尋徵還北

劉方

隋文帝仁壽二年州帥阮佛子據越王城作亂兄子大權據龍編文帝以方爲行軍總管以討佛子佛子懼請降湯帝大業中以林邑反帝改日南爲驩州以方爲驩州道行軍總管

以討林邑方軍至閩梨江林邑兵皆騎巨象四而至方乃多掘小坑草覆其上旣戰僞北林邑逐之象多陷死因以銳師繼之林邑大敗俘馘萬計方追之屢戰皆捷過馬援銅柱南八日至其國都林邑王梵志棄城遁方入城獲廟主十八皆鑄金爲之方刻石紀功而還道病卒

邱和

唐高祖武德五年授和大總管爵譚國公和復奏置都督府主

劉延祐

唐高宗調露元年改交州刺史爲安南都護府以延祐爲都護舊俚戶歲半租延祐責令全入衆始怨延祐誅其渠李嗣

僊餘黨遂叛圍府城殺延祐

曲覽

中宗時爲都護以貪暴失衆心爲司錄甘猛所殺

張順肅宗時爲都護

張伯儀

張順子肅宗至德二載改安南曰鎮南都護府以伯儀爲都
護代宗大厯二年張伯儀更築羅城三年復爲安南都護府
高正平代宗時爲都護

趙昌

代正平爲都護德宗貞元七年昌奏置柔遠軍

裴泰

代昌爲都護爲府人王季元所殺以趙均爲都護

趙均

李象古

憲宗時爲都護爲府人楊清所殺

阮元喜

穆宗長慶二年以元喜爲安南都護以城門有逆水恐州人多出反叛因卜今城時方築小城相者卜曰君力不足修大城五十年後必有高人於此定都建府也至咸通中高駢乃增築羅城

韓約朗州武林人本名重革

文宗太和中廢州都督咸屬安南都護府以約爲都護

武渾武宗時人

裴元祐武宗時人

阮涿宣宗時爲都護經略使

王式

父起王楷之弟也擢進士第式巧於仕宦遷殿中侍御史大中中爲晉州刺史徙安南都護

李鄠

宣宗大中十二年代王式爲都護十二月土蠻引南詔兵襲本府陷之鄠奔武州二年鄠集土兵攻羣蠻復取府城懿宗責其失守貶儋州司戶咸通中罷安南都護府置行交州於海門鎮尋復之

王寬代鄂爲都護

蔡襲

懿宗咸通中南詔率蠻來寇懿宗以湖南觀察使蔡襲代王寬仍發單滑徐汴荆襄潭鄂諸道兵以擊之蠻遂引去時嶺南節度使蔡京忌襲功成罷戍兵襲以蠻寇未定兵疲食盡作十必死狀申於中書省時相信京言終不省四年春正月南詔復率蠻兵五萬來攻復陷府城援兵不至襲左右皆徒步力戰身中十矢欲下船不及溺水而死荆南虞候元惟德謂其衆曰吾輩無船入水則死不若還向城與蠻人鬪以一身易二蠻亦爲有利遂自東羅門入蠻不爲備惟德縱兵擊之殺二千餘人明日蠻將楊思進出戰惟德死之蠻所殺虜

凡五十萬人留兵二萬人懿宗召還諸道兵罷安南都護府置行交州於海門鎮以宋戎爲交州刺史七月復置都護府咸通五年以容管經略使張茵勾當安南軍府事茵逗遛不進夏侯薦高駢以代茵

高駢

駢字千里崇文之孫也世在軍中折節讀書好談論古人少事朱叔明有二鵬並飛引弓祝之曰我且貴當中之一發而二鵬俱貫衆大驚號落鵬侍御以功遷秦州防禦使時南詔盡有交州地咸通五年駢以驍衛將軍爲安南都護府經略招討使悉以張茵所將兵委之九月駢至南峯州蠻衆五萬方穫秋稻駢掩擊大破之遂進攻南詔又破之殺其將段酋

遷及土蠻兵斬首三萬餘級乃廢都護府置靜海軍以駢爲節度使駢據本州稱王自羣蠻爲寇殆十年至是乃安駢修築羅城周回一千九百八十丈零五尺高二丈六尺脚廣二丈六尺四面女牆高五尺五寸敵樓五十五所門樓五所甕門六所水渠三所踏道三十四所又築堤周回二千一百二十五丈八尺高一丈五尺脚闊三丈又造屋五千餘間高駢以我州至邕廣海路多潛石覆舟漕運不通遂命長吏林諷等疏鑿夏四月五日起役踰月之間將欲開達但中間值巨石綿亘者數丈堅硬如鐵刀下刃卷斧施柯折役者相顧殆幾中止五月二十六日當晝黑雲滃興怒風暴作俄而轟雷大發連震數聲倏爾開霽而巨石已破碎矣但餘兩處至六

月二十一日復大震如初而巨石一時且裂事畢因命其處曰天威涇九年懿宗以駢爲石金吾大將軍加檢校尙書右僕射徙天平節度使尋卒

高鄴

駢之從孫懿宗朝駢以鄴嘗爲先鋒薦之代領我州

曾充

僖宗時代高鄴爲節度使以撫字有聲州人呼曾尙書撰交州記一篇

朱全昱全忠兄代袞爲節度使

獨孤損

昭宗時爲宰相哀帝授靜海節度使以代全昱州人號爲獄

尚書

曲顥梁開平元年代損爲節度使

曲全美

顥弟也明宗時代顥爲節度使後爲南海將梁克真所執送南漢以阮進代之

阮進

後唐明宗長興元年南漢主劉龔遣其將梁克真等來伐我州擒節度使曲全美以其將阮進代之

楊廷藝

愛州人唐明宗長興中廷藝發兵攻阮進進逃歸廷藝自稱節度使晉天福二年爲矯公羨所殺

矯公羨

峯州人後晉高祖天福二年春三月羨殺廷藝而代之後爲吳王所殺

右厯代守任自西漢武帝元封元年辛未至石晉高祖天福三年戊戌凡一千四十八年而吳始興或北人除授或本國自稱無慮百餘人見記者八十三人

吳紀

前吳王

諱權姓吳氏先府之子也事楊廷藝爲將軍後晉高祖天福三年冬十二月權自愛州舉兵攻公羨公羨使人求救於南漢劉龔以其子萬王宏操爲靜海軍節度使將兵救公羨宏

操舟師自白藤江入欲攻權而權已殺公羨矣權聞宏操至於海口潛植鐵頭大杙及漲潮使以小舟挑戰而陽北宏操追之潮退杙露宏操拒戰不暇而潮落甚急舟盡礙於杙內權奮擊大破之溺死過半殺宏操權始稱王以晉出帝開運元年王薨在治凡七年

楊平王

諱主將姓楊氏前吳王家臣也吳王薨自立爲王吳王子昌爰奔茶鄉范令公家主將以其弟昌文爲己子昌文弟南興乾興皆幼久之主將使人將兵至令公家索昌爰令公懼匿昌爰於洞中後漢隱帝乾祐三年主將遣昌文及楊杜二使將兵攻太平唐阮二村行至慈廉昌文謂二使曰我先王之

德洽於民心不幸違棄羣臣主將自行不義罪甚大焉今又使我往伐無辜之邑幸而勝之彼終不服爲之奈何二使曰唯命是聽遂反兵襲平王克之昌文以平王與已有恩乃降於張陽使食其邑平王在位七年

後吳王南晉天策

南晉諱昌文吳王權之第二子也以漢乾祐三年廢楊平王而自立稱南晉至周太祖廣順元年遣使迎其兄昌岌與之更相爲政岌稱天策時有華閭洞人丁部領負谿山險固不修臣職二王欲討之部領懼遣其子璉入貢璉至二王責其不庭執璉而往征之踰月不克王乃懸璉竿上謂部領曰不降卽殺之部領怒曰大丈夫豈以兒子之故累大事耶遽命

十餘弓射連二王驚異乃班師焉時天策擅作威福而南晉不復預政矣顯德元年天策薨南晉王遣使於漢劉鋹以王爲靜海節度使宋太祖乾德三年王率師攻太平唐阮二村王船上觀戰爲伏弩所中而薨時十二使君並起各據州郡自治天策在位三年南晉十三年顯德周世宗年號

右前吳王至後吳王凡三主始戊戌終乙丑共二十八年而亡

十二使君

矯三制名公桿據峯州

阮太平名寬一名記據阮家

陳公覽名曰慶據唐林

杜景公名景碩據杜洞

阮遊奕名昌識據王槁

阮郎公名珪據超類

阮令公名守捷據仙遊

呂左公名獮據細江

阮右公名超據扶列

矯令公名順據洄湖

范防過名白虎據藤州

陳明公名覽據江布口

右十二使君始乙丑終丁卯凡三年而丁先王始併

丁紀

先王

諸部領姓丁氏華閭洞人少孤與母媼五人居山神祠側門外有山荷叢葉上蝸迹成天子字王爲兒時與羣童牧牛於山野皆推爲衆兒長以君臣禮事之相與嬉戲則共交手爲椅以捧王又取蘆花爲前導以左右引象天子隊仗暇日羣兒相率摘柴以供役課晚歸其母母見之喜爲烹豚以饗之鄉中父老皆相戒曰此兒器宇非常必能濟世安民我輩若不早附異日必悔其晚率子弟往從之居於涵澳柵其叔獨據柵不從王率衆攻之不勝奔至潭家灣橋壞陷於潭叔欲刺之見二黃龍覆其上叔懼而退乃降時境內無主王聞陳明公賢而無嗣乃以其子往依焉明公一見爲器重之養爲

巳子盡付以所部兵使攻十二使君皆平之戊辰明公卒京
府吏民多往歸之王以趙宋太祖開寶元年稱皇帝於華閭
洞起宮殿制朝儀置百官立社稷尊號曰大勝明皇帝置大
鼎於庭養虎於檻下令曰有犯法者受烹噬之罪人皆懾伏
不敢違命

巳二年閏五月封長子璉爲南越王

庚午三年改元曰太平元年 宋封王爲安南郡王 立王后

五人有年號自此始

辛未太平二年置文武僧道階品以劉某爲都護府太師阮匄
爲定國公黎桓爲十道將軍宋聞王稱尊號使遺王書其略
曰中夏之於蠻貊猶人之有四肢也苟心腹未安四體庸能

治乎叢爾交州遠在天末唐季多難未遑區處今聖朝蓋覆
萬國太平之業亦旣成矣俟爾至止康平帝躬爾母向隅爲
我小患俾我爲絕蹠斷節之計用屠爾國悔其焉追

壬甲太平三年封子璿爲衛王立季子項郎爲太子命阮子猷
如宋修好

甲戌太平五年王得讖曰杜釋弑丁丁黎家出聖明競頭多橫
死道路絕人行

丙子太平七年

巳卯太平十年春越王璉使人殺太子項郎 冬十一月王夜
宴爲福侯宏杜釋所弑及越王璉等先是釋爲桐關吏夜卧
橋上見流星入口釋以爲休徵遂萌弑逆之心王旣遇害釋

潛入宮中匿於霑下踰三日渴甚以手盛雨水而食宮女見之告定國阮匄收斬之與其將軍黎桓奉衛王璿卽皇帝位追尊王爲先王母爲太后王在位十一年壽五十五改元者

一

衛王

諱璿先王次子也先王爲杜釋所弑阮匄黎桓共奉衛王卽皇帝位

二年秋七月宋人伐我衆以璿幼弱共推黎桓爲帝降璿爲衛王

右丁先王至衛王共二主始戊辰終庚辰凡十三年而亡

黎紀

大行王

諱桓姓黎氏長州人也父覓母鄧氏初懷娠夢腹生蓮花俄而結貫收之分與人食及寤莫識其故以天福元年七月十五日生王母見其手色異常語人曰此兒長成恐吾不及享其祿矣逾數年而父母俱亡本州有黎觀察者見而異之養爲己子王遇冬寒覆春而卧觀察視之見有黃龍覆其上由是益奇之及長事南越王璉先王嘉其勇智累遷至十道將軍殿前指揮使太平十年先王遇弑衛王尙幼王乃攝行國政稱爲副王阮匄丁佃以王將不利於孺子乃相率起兵王出師攻之斬佃於陣執匄送京師殺之衛王二年宋太常博

士侯仁寶請兵伐本國宋以仁寶爲交州路轉運使領諸軍來攻時諒州聞兵至以狀聞太后命南柵人范巨備爲大將軍率師拒之師出之日巨備直入省中謂王曰今主上幼弱未知我輩勤勞脫有尺寸之功其誰知之不如先策十道爲天子然後出師軍士聞之咸呼萬歲太后見人情悅服使以龍袞加王躬請卽位庚辰之年王卽位封父爲長興王母鄧氏爲太后

辛巳天福元年春三月侯仁寶軍至浪山陳欽祚至西結劉澄至白藤江王自將拒之植杙捍江宋兵退保寧江王令詐降以誘仁寶北軍敗擒斬之欽祚等聞軍敗引退上尊號爲明乾應運神武昇平至仁廣孝皇帝

壬午天福二年立五王后王遣徐穆等使占城爲所執王怒自將討之斬其王篋眉稅於陣俘馘不可勝數獲宮妓數百人遷其重器收金銀寶貨以萬數滅其城池毀其宗廟是歲還京大饑

癸未天福三年初王征占城經銅鼓山至婆和以海路險阻難於去來使開渠由是舟楫乃通

甲申天福四年造百寶千歲殿於火雲山其柱裹以金銀東建風流殿西建榮華殿左建蓬萊殿右建極樂殿次構火雲樓運起長春殿其側起龍祿殿蓋以銀瓦

乙酉天福五年秋七月丁巳王之誕辰也使造舟江中以竹作假山於舟上號南山遂設競渡禮

丙天福六年宋授王靜海軍節度使

丁天福七年王初耕籍田於隊山得金銀甕一耕於皤悔山得甕一名其地曰金銀田

戊天福八年

巳天福九年管甲楊進祿以驩愛二州附占城王親征擒之復取二州封第三子爲南封王

庚興統元年春正月改元曰興統宋命左正言宋鎬來封王寅興統二年封弟之子爲禦蠻王居峯州

辛興統三年春王御乾元樓觀燈

甲興統五年封第十一子爲行軍王居北岸吉覽州

乙應天元年正月改元命杜亨使於宋封義子爲扶帶王

居扶帶

丙申應天二年王親征麻黃大發舟波三洞拔之

丁酉應天三年秋七月王征杜洞江賊擒之 大水

戊戌應天四年

己亥應天五年王親討何洞之十九州平之

庚子應天六年討峯州賊鄭航擒之命劉紹如宋

辛丑應天七年征莒隆賊賊見王張弩注矢欲射之矢尋墜再

舉絃斷懼而退王御樓船入窮江追之賊陳於兩岸與王拒

戰王兵陷於江衛王璿中流矢死王呼天三聲賊自敗

壬寅應天八年造銀兜鍪數千餘頂頒賜軍人

癸卯應天九年王幸驩州鑿多益港直至暗州

甲辰應天十年王拽曾得巨蛇忽然逆流而去遣行軍王如
宋

乙巳應天十一年王薨於長春殿謂之大行王因爲廟號在位
二十七年壽六十五改元者三葬長州德陵

中宗

諱龍鉞大行第三子也母初侯姨女九歲封南封王大行初
薨王與東城王中國王開明王爭立九閱月國中無主東城
王敗奔占城爲所殺元年正月王卽位凡三日爲開明王所
弑號中宗壽二十五

卧朝王

諱龍廷大行第五子也中宗母弟興統三年封開明王墓中

宗而自立

丙午元年王卽位尊號曰開天應運聖文神武則天崇道大勝
明光孝皇帝王性好殺人有臨刑用茅纏以火燒之又使優
人廖守心持鈍刃而解之以遲其死如此數日其人哀號痛
切守心戲曰汝不慣受死王大笑以爲樂凡征討所獲虜俘
則押赴江岸潮退令人作水牢驅入其中潮漲則呵呬而亡
又使登高木從下伐之王又幸支寧江江多蛟乃繫人於舟
側往來中流令蛟害之凡牲牢將供庖厨先使人牽入手刺
殺之然後付庖人又削甘蔗於僧統郭卯頭上陽爲失手傷
卯頭流血王大笑或夤夜殺猫賜諸王食食畢以猫頭示之
諸王皆嘔吐每視朝則使優人喋喋其口以亂執政之奏事

又以守宮爲膾以與人相爭而食諸王叛王討平之伐禦蠻王克之改峯州爲太平府尊母氏爲興國廣聖太后

丁未二年定文武官制一遵於宋

戊申三年正月改元景瑞元年王親征都良渭龍二州俘蠻人及馬數百匹使人以杖擊蠻因痛甚蠻大呼誤犯大行諱王大笑再命擊之蠻人復呼屢犯王甚悅又討愛州俘其人作囹圄其中而笑之

己酉景瑞二年秋七月王征驩唐何石等州 冬十月辛亥王薨於寢殿號卧朝王王有痔疾卧以視朝年二十二卽位在位四年年二十五改元者一

右黎自大行至卧朝共三主始庚辰終己酉凡三十

年而亡

越史略卷一終

越史略卷二

阮紀

太祖

諱蘊姓阮氏北江古法人也母范氏以太平五年二月十七日生幼而聰睿器宇恢豁遊學於六祖寺僧萬行見而異之曰此非常人也強壯之後必能濟世安民爲天下主及長慷慨有大志不事產業好涉獵經史應天中事宗及中宗爲卧朝所弑羣臣皆奔亡惟王獨抱尸而哭卧朝嘉其忠拜左親衛殿前指揮使王所居鄉中有木綿樹爲雷所震其迹成文云樹根杳工木表青青禾刀木落十八子成震宮現日兌宮隱星六七日間天下太平萬行乃謂王曰臣近見識文之

異知黎當亡而阮當興也阮氏無若公之寬慈仁恕頗得衆心臣年七十有餘但以不及見盛治爲恨耳王恐語泄使萬行匿於芭山景瑞二年卧朝薨嗣主幼沖王年三十六將隨龍軍五百人入宿衛時在內祇候陶甘沐揣知王有欲受禪之意遂以間微激之曰主上冥頑多行不義天厭其德弗克壽終嗣子沖幼未堪多難庶事煩擾百神靡依下民嗷嗷欲求其主親衛盍因此時遠追湯武之迹近鑒楊黎所行上順天心下從人望而猶守區區之小節耶王雖內悅其言而疑有奸謀乃陽罵之曰公何爲敢出是言吾必執以送官甘沐徐曰臣見天時人事如此故敢啟之今欲送官誠不辭死王曰吾安忍告公但恐語泄而併誅耳甘沐復謂王曰國人皆

謂阮當代黎圖讖已見不可掩也轉禍爲福今其時矣親衛
尙何疑乎王曰吾觀公志與萬行不異誠如此言計將安出
甘沐曰方今百姓疲弊民不堪命親衛若撫以恩德彼必翕
然從之猶水之就下孰能禦之甘沐知事急恐變生乃語朝
中卿士卽日皆會於朝堂謀曰今者億兆異心上下離德人
怨先王之苛虐不欲歸從嗣君咸有推戴親衛之志吾輩不
因此時立親衛爲天子倉卒有變得保其首領耶於是共扶
王正殿立爲天子百官皆呼萬歲

元年冬十一月王卽位大赦天下焚網羅獄具羣臣上尊號
曰奉天至理應運自在聖明龍見睿文英武崇仁廣孝天下
太平欽明光宅昭彰萬邦顯應符感威震蕃蠻睿謀神功聖

治則天道政皇帝追尊考曰顯慶王母明德太后冊王后六
立長子瑪爲太子餘皆侯爵王女十三人皆公主以長女安
國公主嫁於陶甘沐封爲義信侯王兄某爲武威王弟爲翊
聖王陳鎬爲相公吳丁爲樞密使歸碩輔爲太保鄧文孝爲
太傅裴車磊爲左金吾譚坦爲左武衛杜間爲右武衛 初
古法鄉應天寺犬生一白子背上黑毛成天子字至是王以
甲戌生

庚戌二年正月改元順天元年初王以華間城湫隘乃遷都大
羅城初遷時泊舟城下黃龍見於御舶因號昇龍改華間爲
長安府北江曰天德 古法曰天德府昇龍京內起朝元殿
左置集賢殿右置講武殿左啟飛龍門右啟丹鳳門正陽啟

高殿堦曰龍墀墀內翼以迴廊周匝四面乾元殿後置龍安
龍瑞二殿左建日光殿右建月明殿後有翠華宮城之四面
啟四門東曰祥符西曰廣福南曰大興北曰曜德又於城內
起興天寺五鳳星樓城離方創勝嚴寺

辛亥順天二年王親征愛州莒隆賊平之是歲又於城內起太
清宮萬歲寺鎮福藏城外建四天王寺衣錦寺龍具聖壽寺
又起含光殿於瀘東步 占城國進獅子

壬子順天三年建龍德宮於城外以居太子欲其周知民事

十二月神人留迹於東南峯盤石上長廣三尺深一尺 眞

臘國來貢 王征演州

癸丑順天四年御含光殿觀競渡 冬十月王征渭龍州蠻克

之

甲寅順天五年命翊聖王討蠻將杜長惠於金華步克之斬首
萬計俘獲士馬不可勝數 籬州獻麒麟 改應天府爲南
京 眞臘來貢

丙辰順天七年大熟禾三十結直錢七十文賜境內三年租起
天光天德二寺及塑四天帝像 地震 望諸名山 度京
師人千餘爲僧道

丁巳順天八年乾元殿震 宋眞宗封王爲南平王

戊午順天九年使阮清道如宋求三藏經得之

庚申順天十一年命王子討占城克之 初乾元殿震視朝於

東殿今又震視朝於西殿

辛順天十二年春二月戊子以王誕日爲天成節築萬歲南山於廣福門外多作飛禽走獸之狀羅列其上

壬順天十三年命翊聖王作大光厯

癸順天十四年改潮陽鎮爲永安州

甲順天十五年命太子伐峯輪州開國王伐都金州築昇龍城

乙順天十六年僧萬行化身 眞臘來貢 詔立番寨於驢

州南界

丙順天十七年命太子討濱州 遣使如宋

丁順天十八年命太子討七源州東征王討文州

戊順天十九年春二月王不豫三月戊戌薨於龍安殿壽五

十六廟號太祖葬天德府壽陵在位二十年改元者一

太宗

諱德政名佛瑪太祖長子也母黎氏太祖卽位封開天大王又立爲太子順天十一年奉命平諸蠻賊有功太祖薨羣臣奉遺詔詣龍德宮請卽位時翊聖武德諸王皆伏兵於廣福門外欲襲王王自祥符門入至乾元殿三府兵攻益急王命阮仁義擊之三府兵敗武德王爲黎奉曉所殺是日王卽位於柩前大赦改元以順天十九年爲天成元年上尊號曰開天統運尊道貴德聖文廣武崇仁上善政理民安神符龍現體元御極億歲功高應真寶厯通元至興隆大定聰明慈孝皇帝初王生於長安府府中民家牛無數自換其角占

者曰丑生人爲天子言訖不見至是王以丑年生 開國王
據長安府以叛王親征之開國王降詔免其罪 五月神人
現迹於萬歲寺以梁任文爲太師吳尙丁爲太傅陶處忠爲
太保阮道紀爲樞密阮徹爲左參知政事廖嘉真中書侍郎
矯蓬爲右參知政事何遠爲諫議大夫歸文雷爲左腹心阮
仁義爲右腹心置殿前築軍十衛一曰廣聖二曰廣武三曰
御龍四曰捧日五曰澄海每衛各分左右 六月以王誕日
爲天聖節築萬歲山於龍墀有五峯中峯立長壽仙幘左右
皆有白鶴山上爲飛仙鳥獸之狀山腰又有神龍蟠繞開植
旌旗懸金璧使伶兒在崑中弄笛吹笙歌舞爲樂

已天成二年以諒州牧申紹泰尙平陽公主愛州但乃甲叛

王親討擒之

神人現迹於天勝寺

龍現於乾元殿基王

曰其殿已圯惟基獨存今龍現之意其龍勝之地乎乃增廣其規模而重修之改名曰天安殿殿左起宣德殿右起延福殿前曰龍墀東置文明殿西置廣武殿墀之左右對曰鐘樓以登聞寃獄之事前安奉天殿上建正陽樓爲掌漏刻之處後起長春殿上建龍閣其外築城曰龍城 秋八月驩州獻麒麟一 冬十月萬歲寺前雨白米成堆

庚午天咸三年起天慶殿後架鳳凰樓 冬十月王幸烏路省

大熟

欽命大僚班黎偓佺使於宋

辛未天咸四年驩州叛王討平之

造寺觀凡一百五十處

壬申天咸五年釋迦寺優曇樹開花

四月王幸杜洞江耕籍

是田獻九穗禾詔改其田曰應天

癸酉天成六年春定源州叛王討平之 九月薨源州叛王討

之

戊甲天成七年四月改元通瑞元年詔羣臣奏事於王前者稱

王曰朝廷 秋九月幸仙遊山重先寺詔起重興殿 古州

法雲寺僧上言寺中放光數道隨光掘之得石函一函內有

銀函銀函內有金函金函內有瑠璃瓶瓶中有舍利

乙亥通瑞二年天慶殿前生芝草封王子日中爲承乾王 起

造西市及長廊建太和橋於蘇厯江 愛州叛王親征克之

王在愛州行宮宴羣臣密指定勝將阮慶曰此必反矣左右

問其故曰此人瞻視異常動止失節見我有漸色是故知之

其年果反

丙子通瑞三年春三月以峯州牧黎順宗尙慶城公主 四月

置驪州行宮 都金常新平原等州叛

丁丑通瑞四年以開皇王爲元帥討都金等州克之烏路桑園

中古佛湧 設競渡禮 大水

戊寅通瑞五年幸布海口耕籍田 秋八月王御含光殿觀競

渡 九月神人現迹於天勝寺 宋仁宗封王爲南平王

占城王子地婆刺等來朝

己卯通瑞六年春正月廣源州首領儂存福叛稱昭聖皇帝封

長子智聰爲南衙王改其州曰長其國王親討之師渡冷浮

津白魚入王舟至廣源州存福焚其部落而遁縱兵追之獲

存福其子智高脫身而走執存福歸京斬之 夏五月廣源
州獻生金一塊重一百十二兩 六月改元爲乾符有道元
年 冬十二月真臘國來貢 遣使於宋

庚辰乾符有道二年春正月朔日有食之

辛巳乾符有道三年夏五月定宮女階品 六月殿前指揮使

丁祿馮律等謀叛事覺伏誅 冬十一月以明威侯知又安

州儂智高與其母阿儂自雷火洞復據儂猶州改其州曰大
曆國王命討之生擒智高王憐存福旣被誅因原其罪畀以
廣源雷火平婆思浪等州

壬午乾符有道四年春三月王幸茹覽海口耕籍田 地震

交州叛冬十月改元明道元年 詔中書省刪定律書 十

一月詔諸路各置亭候以便四方之觀認 凡老弱及有大

功已上犯罪者得贖銅 鑄明道錢 梁茂材使於宋

癸未明道二年夏四月愛州叛 五月以開皇王爲都統大元

帥討愛州奉乾王爲都統元帥討文州文州平 夏四月王

幸武寧州松山寺見其頽殿中有石柱欲壓上慨然有重修

之意石柱忽然復正因命儒臣作賦以紀其異 秋九月使

魏徵如廣源州賜智高郡王印仍拜太保 詔造艦數百艘

皆作龍鳳魚蛇虎鸚鵡之形 冬十月長春殿御盾自動

甲申明道三年二月御盾復動 癸卯親征占城以開皇王爲

留守甲申發自京師乙巳次大惡海口時波濤帖息大軍利

涉自大安至姑山紫雲捧日至碯灣有片雲覆王舟隨其行

止至思明海口白魚入舟王聞占城王先列象陣於五湖江
以待官軍遂詔軍士捨舟登陸王乃部分士卒建旗鳴鼓欲
擊之賊見兵威甚盛遂先潰王追斬三首郭嘉懿斬其王仁
斗以獻獲象三十頭生擒五千人餘爲亂兵所殺者無數王
爲惻然下詔有殺占城人者斬 秋七月大軍入佛誓城俘
其宮女妻妾 八月班師至長安府黃龍見於王舟九月王
至自占城 冬十月改元天感聖武元年大熟 十二月置
懷遠驛於嘉林以館四方客使 太保儂智高來朝
酉天感聖武二年春三月立大內碑 夏五月造太平車以
黃金爲飾

兩戊天感聖武三年夏五月起銀漢宮於後苑以居占城宮人

丁亥天感聖武四年置望國鎮及歸德保康宣化清平永通感
化安民七驛各立碑候以爲蠻夷歇宿之處占城來貢詔流
其使於真登州以其王雍尼不恭故也

戊子天感聖武五年儂智高以勿惡洞叛命武威侯及太尉郭
盛諡討之交戰之日天地晦冥俄而轟雷震於洞中其酋長
支體磔裂舉洞驚駭遂降 三月立杜壇於長廣門外以爲

四時祈穀之處 秋九月開瓊林勝景春光三園 冬十二

月詔定打春牛法 范去了謀反事覺劓其肉於東西市

丑巳天感聖武六年春三月改元崇興大寶元年秋八月鑿御
溝於鳳城外又開金鳴萬歲池初鑿池中鏗然有聲掘之
得黃金一塊重五十兩因以名又築石山三峯於池上建舞

鳳橋

庚寅崇興大寶二年置決旱大發文湘洞於宋境西平州界

儂智高據宋界安德州勿陽洞以其洞爲南天國改元景瑞
愛州五縣江龍池甲叛

辛卯崇興大寶三年開瑞清沼應明池於勝景園 置內外隨
龍軍命左驍衛將軍陳稔將五縣人鑿个凜港

壬辰崇興大寶四年智高請附於宋宋不納乃寇於宋 五月
智高攻破宋橫山寨遂陷邕州以其州爲大南國自稱仁惠
皇帝

癸巳崇興大寶五年宋伐智高使梁珠來乞師詔以殿前指揮
使武珥爲招討使以援之是月宋狄青敗智高於歸仁智高

奔大但國三月鑄鐘置龍墀令民之有冤抑不達者聽撞其鐘以聞 宋石鑑從特磨道襲智高母阿儂阿儂年已六十餘矣大但人函智高首獻於宋斬阿儂於都市由是諸儂遂滅

甲午崇興大寶六年九月戊寅王不豫冬十月辛卯薨於長春殿壽五十四在位二十六年

○此下當有改元者六四字

葬天德府壽陵

聖宗

諱日尊太宗第三子也母梅氏太宗夢月入后懷因有娠以順天十四年二月二十五日生於龍德宮天成元年立爲太子及長通經傳曉音律尤長於武略太宗命征伐所向皆克太宗薨奉遺詔卽位於樞前十月改元以崇興大寶六年爲

龍瑞太平元年尊母梅氏曰靈感太后上尊號曰法天應運
崇仁至德英文睿武慶感龍祥孝道聖神皇帝 詔焚網羅

獄具

出翠華宮女

賜東宮文武臣僚爵各有差以裴嘉

祐爲文明殿大學士范彝爲左威衛陳改爲右威衛劉慶爲
左清道王行爲右清道改神衛匡聖都爲拱聖廣德都爲忠
武廣武都爲昭武及增置左右龍翼都各一百人 丙午葬
太宗立后八人以阮道成爲太師郭肇日爲太尉 建永壽

殿

乙未龍瑞太平二年修大內諸殿

癸丑以王生日爲乾興節

占城來貢

秋八月王御水晶殿觀競渡

冬十月大寒

王謂左右曰我居深宮之中御獸炭襲狐裘冷氣猶且如是

況囹圄之中縲紲之苦曲直未分腹之不充形之不蓋一爲
寒風所逼豈不死於無辜我甚憫之其令有司發府庫衾席
賜之仍日給二飯賜境內今年稅錢之半造東林寺及東究
山靜慮寺 宋仁宗封王爲郡王 遣使於宋

內龍瑞太平三年設羅漢會於天安殿 秋八月眞臘來貢

造崇慶報天寺發府銅一萬二千斤鑄鐘留於其寺王爲親
製銘文 冬十月巳酉下勸農詔 改大首領爲刺史

丁龍瑞太平四年春三月起大勝資天寶塔於崇慶報天寺
高數十丈其制爲三十層 夏四月王使員外郎梅元清以
麒麟二遣於宋 申午黃龍自瓊林園見於長春殿前安州
道叛 冬十月王幸道大旁海口黃龍見於金鳳舟因改爲

祥龍 十二月起天福天壽二寺以黃金鑄梵王帝釋像以安置 占城來貢

成龍瑞太平五年起壺天八角殿於金鳴池 三月闢祥符門起樓其上 夏五月黃龍自龍德宮見於永壽殿 六月起靈光殿左立建禮殿右立崇儀殿殿前構獨柱六角蓮花鐘樓 秋九月王幸波路海口因幸塗巧築塔處

已龍瑞太平六年春三月王蒐於諒州南平江因幸駙馬申景元第造崇嚴報德寺於武寧州 夏六月黃龍見於永壽殿 癸未改元以龍瑞太平六年爲彰聖嘉慶元年 秋八月丁丑御水晶殿視賜羣臣戴幘頭著靴自此始 丙戌黃龍見於長春殿賜塗山塔號曰祥龍塔 選京師諸色人男

爲黃男 造延興土恒門 占城來貢

子彥彰聖嘉慶二年禁御船火拱聖火隨龍火及內庖人出入御塔不得與在內小祇候相語及通信物往來違者死罪遇赦不原 二月壬申王幸西源州捕象獲白象三 夏六月諒州牧申紹泰以兵入宋界西平州如熬縣捕本州逃亡人虜其指使楊侶才及男女牛馬不可勝數宋遣吏部侍郎余靖赴邕州議其事王命裴嘉祐等赴邕會議靖厚賂嘉祐及附書乞還侶才主不省 秋八月王幸交海口黃龍兒於延春舶因改交海曰天符海口 王親翻占城樂曲及節鼓音使樂工歌之 冬十月造行宮於窑潭以觀魚 占城來貢渭龍州獻白象

辛丑彰聖嘉慶三年羅順州獻白象 沙蕩洞叛王親征克之

愛州五縣江叛 祈嗣於芭山黃龍見於壇內

壬寅彰聖嘉慶四年嘉林郡進六眸三足龜 秋九月使人採

金於武健洞採銀於下連縣

癸卯彰聖嘉慶五年夏六月起洞仙宮於大內之東 獻白龜

王命起寺於芭山以爲祈嗣之處獲其珠以獻 冬十二月

起銀河門 朝賀日指使唱聖躬萬福軍士應聲唱喏 占

城來貢

甲辰彰聖嘉慶六年春二月日有重光 夏五月造布海口行

宮 冬十月麻沙洞叛王討克之黃龍見於清瀾舶 宋英

宗加王同平章事

己彰聖嘉慶七年春二月觀魚於扶龍潭 丙午幸布海行
宮耕籍田 夏六月王御天慶殿聽訟時王女洞仙公主侍
側王顧公主謂獄吏曰吾之愛吾子亦猶天下父母之愛其
子也百姓無知自冒典憲吾甚憫焉應自今罪無輕重一從
寬宥 秋七月忙貫州叛王討降之 八月開上林園丙辰
黃龍自大明殿見於會元殿又見於布海行宮癸未幸究瀾
行宮號其宮曰景興窑潭行宮曰翫春宮 冬十二月黃龍
見於曜靈殿又見於遊蟾閣猗蘭元妃所居 占城來貢白
犀一

丙午彰聖嘉慶八年春二月改元爲龍彰天嗣元年 三月黃
龍見於太子宮中 甲申都曹陶池獻白雀 九月蠲檳榔

稅 甲子王使郎將郭滿築塔於仙遊山 冬十一月辛啟

瑞行宮省欽 平陽公主男申道元尙天成公主

丁龍彰天嗣二年以員外郎魏仲和鄧世資爲都護士師書
家十人爲按獄吏賜仲和世資每月俸錢各五十貫禾各二
百結并鹽魚等書家各二十貫禾一百結以止其受賂之心
夏六月辛亥黃龍見於位仁行宮 辛卯王幸位仁省欽
及觀競渡

戊申天貺寶象元年春正月眞登州獻白象二凡郎州獻白象

一 黃龍見於曜靈殿 二月都臘縣獻白象及白雀 黃

龍見於啓瑞行宮 夏五月又見於會仙殿 修戰艦 秋

八月龍舟無故自動離本處三尺 九月黃龍見於永春清

瀾二舶 宋神宗封王爲南平王加開府儀同三司 遣使如宋

巳神武元年春二月戊戌詔親征占城國 丁未盟於龍墀
庚寅發駕丁巳至乂安州黃龍見於金鳳舟庚申次南界海
口黃龍又見於金鳳舟 乙丑使大僚班黃捷等攻日麗海
口克之 巳巳度大長沙庚午次思容海口 三月癸酉夜
龍見於景勝舶丙午次尸喇皮柰海口有二鳥並飛隨王舟
如導從之狀大軍前進次須毛江岸見其將布皮陀囉等陣
於江岸官軍縱擊斬布皮陀囉占城死者不勝數其主第矩
聞軍敗乃攜妻子夜遁是夜引軍傳佛誓城至同羅津佛誓
人降 夏四月元帥阮常傑俘獲第矩於真臘界 夏五月

王宴羣臣於占城王殿又親舞盾擊毬於其堦 王命徧數
佛誓城內外人家凡二千五百六十餘區並焚之是月班師
癸巳次思明海口是夜黃龍見於御舶 六月己巳渡海黃
龍見於金鳳舟 戊申渡布政海口大小磊磊山龍舟觸石
而破 辛酉王至自占城次朝東津詔有司肅軍容盛陳儀
衛上御寶車羣臣皆騎馬導引占城王第矩戴麻骨冠著白
氎衣以絹繫腰令與武都五人牽之繫其黨屬以從 秋七
月奏捷於太廟 丙辰黃龍見於寶車 冬十一月丁丑赤
羽夾日 真臘來貢

庚戌神武二年夏三月造紫神殿 五月黃龍見於長春宮龍
光殿 秋七月乙卯黃龍見於位仁宮 九月造東南二天

王寺

辛亥神武三年春正月御書佛字長丈有六 自春至夏不雨
定贖杖刑銅數 冬十二月王不豫詔有司誤入官職都
左右廂者杖八十

壬子神武四年春正月庚寅王疾亟薨於會仙殿壽五十廟號
聖宗在位十九年改元者五葬天德府壽陵

仁宗

諱乾德聖宗長子也母猗蘭元妃黎氏以龍彰天嗣元年正
月生王於洞仙宮卽日立爲太子王爲人日角龍顏手垂過
膝尤通音律凡樂工所習歌曲皆王所親製以神武曰年春
正月卽位於柩前尊母猗蘭元妃爲太妃上尊號曰憲天體

道聖文神武崇仁懿義純誠明孝皇帝以上陽太后同聽政
夏四月八日行浴佛禮王御天安殿視朝是日以大僚阮
常傑爲檢校太尉阮日成爲兵部侍郎以下各有差 赦都
護府囚諒州牧楊景通獻白鹿羣臣上表稱賀拜楊景通爲
太保 眞腦來貢 秋七月黃龍見於永壽殿 葬聖宗

羣臣上中元節賀表

王幸窑潭行宮

蠲占城白氎賦

迎法雲佛赴京師祈晴

祀傘圓山

閤使魏徵以年老致

仕詔賜几杖

詔遴選諸僧有投獻詩及僧官之職文字者

隸爲書家以補其職之缺

徙捧日坊於南市

王御天安

殿羣臣上賀立表造長廣門太平門上水河門迎秋祠歸仁
驛凡五處以王生日爲壽天節 立后二人

麟二年正月改元曰太寧元年尊太妃爲太后 靈仁太后

姓嫉妬以嫡母而不得預政因謂王曰老母劬勞以有今日

及富貴而他人是居將寘老母於何地乎王雖冲幼頗知葬

上陽太后子乃幽上陽水后及其侍女七十二人於上陽宮

逼令殉聖宗葬 占城國來貢 秋七月黃龍見於遊蟾閣

八月峯州獻白鹿 宋神宗封主爲郡王

甲寅太寧二年拱聖都火頭江曳家火延燒大興門 夏四月

重修大興門黃龍見 白雀效質於禁庭 秋九月黃龍見

宋王安石秉政有獻言者謂我國已爲占城所破餘衆不

滿萬人可計日以取於是以沈起劉彝知桂州起彝乃集溪

洞土丁爲保甲又於海濱造舟艦教水戰禁州縣不與我邊

貿易王知之乃先發諸道兵十萬人分爲二道使阮常傑領水軍出永安攻欽廉宗亶領陸軍出永平攻邕州我師所向無前常傑攻陷欽廉二州復與宗亶會圍邕宋廣西監張守節率兵救之至崑崙關常傑迎戰大破之斬守節知州蘇緘以城固守我爲飛梯以臨城彼施以火炬飛梯不能近又以毒矢射之城上人馬死者相枕彼以神臂弓發我之象軍多有殪者城高而堅攻之四十餘日不能下獲宋人教以土囊傅城而登常傑從之城遂陷蘇緘奔還州解先殺其家屬三十六人後乃縱火自焚軍士求緘不得乃盡殺吏民五萬餘人是役也所殺獲邕欽廉三州人無慮十萬

乙卯太寧三年春正月奏捷 占城來貢

丙辰太寧四年春三月王觀扞水城黃龍見於王舟 青龜負

圖以見 秋七月宋以廣南宣撫使郭達趙高爲招討使總

九將軍來伐我國王命阮常傑領水軍拒之昭文宏真二侯
皆溺死如月江兩軍相持月餘常傑知宋軍力困夜渡江襲
擊大破之宋兵死者什五六遂退取廣源州 冬十月改元
爲英武昭勝元年 十二月以內給事黎文盛爲兵部侍郎

丁巳英武昭勝二年夏五月設仁王會於天安殿 秋九月築

隄於如月江長六萬七千三百八十步 冬十月幸符仁省

欽遂幸龍水海口龍見於王舟 占城來貢

戊午英武昭勝三年閏正月修大羅城 二月朔詔罷秋筵宴

禮 使員外郎陶宗元領馴象五遣於宋請還廣源蘇茂等

州宋人徵還所掠三州民兵 大水入城內

巳英武昭勝四年諒州獻白象 雨雹 五月大熟 天成

公主獻六眸三足龜 冬十月黃龍自常春園見於其宮

庚申英武昭勝五年春三月王幸窮江觀魚 夏四月巳亥神

龜負圖五月唐人林瓊獻紫芝 秋八月甘露降 王御靈

光殿觀競渡 閏月設秋筵宴禮 王幸符仁省歛

辛酉英武昭勝六年冬十一月日有重光 占城來貢 王還

三州人丁於宋宋亦以廣源等州還於我 使員外郎梁用

律如宋請大藏經

壬戌英武昭勝七年春二月降欽聖公主於渭龍州牧何彝慶

冬十二月祇候宏阮波斯謀反伏誅 占城來貢

癸亥英武昭勝八年春二月王御天慶殿閱定京城黃男爲三

等三月選美女爲萬延宮女 夏五月黃龍飛自紫宸殿見

於會仙殿 五月造洞仁宮 六月御車火 秋九月麻沙

洞叛 冬十月親討克之 觀競渡 占城來貢

甲子英武昭勝九年夏六月使兵部郎中黎文盛如永平寨議

疆界事宋以文盛爲龍圖閣待制 冬十一月詔國中造瓦

屋 占城來貢

乙丑英武昭勝十年春二月丁亥改元廣祐元年 秋八月以

黎文盛爲太師 占城來貢

丙寅廣祐二年春正月阮遠獻六眸龜胸有圖書 二月真臘

來貢有婆羅二人 冬十一月起大覽山寺 競渡 占城

來貢

丁廣祐三年夏五月起造秘書閣 冬十月幸覽山夜宴羣臣於山上王製覽山夜宴詩二首留題 宋哲宗加王同平章事 占城來貢

咸廣祐四年秋九月戊申置十大書家 冬十月築覽山塔 十二月景靈宮成 占城來貢

己廣祐五年二月造冷淫徑 宋兵入石犀州 占城來貢 庚廣祐六年春二月合歡宮成 宋哲宗封王爲南平王遣使如宋

辛廣祐七年春二月王幸諒州觀捕象 見官黎全義獻五色龜黎文盛獻白象一 占城來貢 競渡

軒廣祐八年夏五月造啟瑞行宮 大熟 十二月改元會

豐元年

酉會豐二年冬十月朔日有食之 優曇樹開花

卯會豐三年秋九月覽山寺成賜名景隆同慶寺王書篆額
占城來貢 遣員外郎阮利用如朱

亥會豐四年夏五月詔諸侯子入朝 六月聖極后薨 眞
臘占城來貢

丙子會豐五年冬十一月王觀魚於窑潭時王御小舟侍衛甚
少木師黎文盛久蓄姦謀因以幻術起大煙霧潭中晝冥俄
而王聞櫓聲稍近意其有變以戈撻之煙霧隨戈而斂見文
盛舟已迫果石簋具使人擒之詔流文盛於梁江頭初文盛

家有大理奴善爲幻術文盛師事之至是乃反

丁丑會豐六年秋八月白日星見 赦都護府囚人 冬十一

月禁百姓造瓦屋大舟 占城來貢 競渡

戊寅會豐七年秋八月地震 彗見 起陸地鰲山設競渡禮

九月造崇淵殿於芳蓮池左置暉陽殿來鳳亭右立映蟾
殿退雲亭前起長鳴樓後跨玩花橋 遣員外郎阮文信如

宋乞三藏經 占城來貢

巳卯會豐八年捧日都獻六眸龜 秋九月起安老山寺 冬

十月禁京城婦女不得效宮妝 占城來貢

庚辰會豐九年夏四月造僊遊山永福寺 秋七月以矯文思

爲上林國士師 十二月大疫

辛龍符元化元年春正月改元 二月王觀魚於窮江遂幸
應豐省耕 夏六月王幸符仁省種 秋七月賜百官秋衣
設宴禮 造開元觀 九月王觀魚於窮江黃龍見於翔龍
舸 冬十一月慶雲見王御象柵觀捕象黃龍見 十二月
改驩州爲义安府造起延祐寺

壬龍符元化二年春二月王幸應豐行宮省耕 冬十二月
立春瑞雪降 造開元太陽北帝三觀 造瑞雲車 大水
占城來貢 遣員外杜英厚使於宋

癸龍符元化三年春正月詔京城內外皆築堤捍水 二月
太后發府錢贖諸貧家女之典命者嫁與鰥夫 秋八月置
龍翔都 冬十月立鹿來 競渡

甲龍符元化四年春三月閏左右興男勇捷兵爲玉墻都御
龍兵爲興聖廣武都百姓之大族者爲武勝兵改田兒爲鐵
林兵 秋九月朔延成侯以笏擊忠義侯於天安殿 占城
來貢 競渡

乙龍符元化五年春正月菖蒲生花 二月祠高禰 夏六
月太尉阮常傑卒 秋九月築延祐寺白瓷塔二築覽山石
塔三 冬十月東梁州湧生金 十一月朔日食過半 占
城來貢 大疫

丙龍符元化六年春二月王幸塗山 夏五月彗星見 秋
七月造銀羅城 十一月王將有事於宋造永隆二腹舶及
造戰船 員外郎魏文相使於宋 占城來貢 天成公主

進白象二

刻龍符元化七年夏六月王幸章山黃龍見 冬十一月地

震 十二月造都護府

戊龍符元化八年春正月築章山塔 築隄於機舍港 昭

聖后薨 占城來貢

丑龍符元化九年夏四月王聽逆黨蘇厚杞崇訟厚崇皆上
木馬 冬十二月造洞靈臺

庚會祥大慶元年春正月設廣昭燈會於大興門外 三月

婦人黃氏獻鳳雛毛羽具五色九苞是月參政徐文通獻白

虎 白馬生距檳榔一本生十二株 獻白雀 秋八月占

城國獻異象所居有神光見 遣員外郎陶彥使宋

辛會祥大慶二年夏四月清化府獻檳榔一本生九株獻

白龜 白雀至禁庭 日重輪 大熟 留守張延福獻白

雀 冬十一月日重輪 占城來貢

壬辰會祥大慶三年春正月甘露降 二月清化人言海邊有

異兒年方三歲解言語自稱皇帝的子號曰覺皇凡王所動

止無不先知王命中使往問之所言皆驗乃迎以歸居於報

天寺王以其靈異愛之愈隆時王無嗣欲立爲太子羣臣不

可乃止遂設齋會於禁中欲令覺皇投入爲已子有佛跡山

僧徐路道行者聞之而不悅乃使其姊徐氏赴會密以數珠

結印授之曰至會所則插在簷端勿令人知見徐氏如其言

覺皇忽嬰熱病遂語人曰所見徧滿國界皆有鐵網羅罩無

路得入託宮中王命大索乃獲徐氏所藏數珠遂收路繫於
興聖廊欲寘於辟崇賢侯入朝路哀叫曰願賢侯拯救貧僧
僧幸得脫則入爲侯子以報其德侯許諾入見王百般營救
謂覺皇實有神力而爲路所咀解是路勝於覺皇明矣臣謂
莫若賜路之託生也王原之覺皇疾亟囑曰我死後宜造浮
屠於僊遊山而葬之夏四月獻芝草優曇花及白鷄秋
九月黃龍見於永光殿冬十月黑龍見於宮中

癸巳會祥大慶四年秋八月黃龍見於大明殿獻白鹿

甲午會祥大慶五年春正月瑞雪降三月黃龍見於章山塔

繞三匝獻白雀六眸龜冬十月以內常侍黎伯玉爲大理

寺造勝嚴寺置善法堂四面建千佛樓安千佛寶相競渡

員外郎陶信厚齋象頭使於宋

乙未會祥大慶六年春二月進茄花結三果 三月超類鄉崇

福寺成 夏六月日重輪 秋七月獻金龜

丙申會祥大慶七年春正月設廣照燈於大興門外製木僧繫

鐘 夏四月獻檳榔珠 六月僧道行化身神宗生 冬十一

月獻三足六眸龜 占城來貢 競渡

丁酉會祥大慶八年春正月獻白鹿立鹿 三月上幸章山黃

龍見 夏四月獻三足六倖龜胸有善帝二字 司農州獻

赤馬生距黃龍見於洞靈祈壽寶臺 秋七月猗蘭太后薨

謚曰符聖靈仁太后 八月葬靈仁太后火葬太后是夜龍

見 冬十一月立崇賢侯子陽煥爲太子

戊戌會祥大慶九年春二月真臘占城來貢 冬十一月甘露
降 禁家奴不得身上刺龍 員外郎阮伯慶賫象犀於宋
亥會祥大慶十年冬十月盟國人於龍墀 下詔伐麻沙洞
軍出之日黃龍隨船而行 成慶侯獻六眸龜胸有玉字
王擊麻沙洞破之 宋徽宗加王守司空

庚子天符睿武元年春正月改元 夏六月獻白雀 秋九月
黃龍見 冬十月構衆仙臺 占城真臘來貢 競渡

辛丑天符睿武二年夏五月大水至大興門 秋七月造僊遊
山廣教寺 競渡

壬寅天符睿武三年春二月隊山崇善延齡寶塔成 秋八月
觀競渡新製銀纓引於鹵簿 員外郎丁慶安使宋

癸卯天符睿武四年春正月誕聖節新製推輪舞亭 秋八月

設秋筵宴禮 冬十月辛應豐行宮造飛橋過波刺江築通

霄臺 真臘來貢 大熟

甲辰天符睿武五年冬十月築鬱羅臺 大旱禱之乃雨

乙巳天符睿武六年夏四月瑞聖公主獻六眸龜胸有國土安

寧四字 六月王幸應豐黃龍見於行宮 冬十一月黃龍

見於洞靈宮以內常侍牟都俞爲中相

丙午天符睿武七年春正月禁春不得伐木 二月王御天安

殿觀諸王侯蹴毬於龍墀 夏五月黃龍見於永光殿 秋

八月神龜見中有道定王閣延寧公主八字 冬十一月使

令書家嚴常徐延等使於宋至桂州見其經略司謂常延曰

今年京東湖南等處並已調發兵馬拒大金國未審歸期在何日此間鋪馬斷絕在在更少請使領還禮物大金元帥等以是歲執宋徽欽二帝北歸宋國大亂

丁未天符慶壽元年冬十二月王薨於永光殿壽六十二在位五十六年廟號仁宗改元者入葬天德府

越史略卷三

神宗

諱陽煥聖宗之孫崇賢侯子也母杜氏生三歲仁宗養於宮中立爲太子以天符慶壽元年十二月卽位於柩前殯仁示於壺天殿癸未成服乙酉王御天安殿視朝卽日除服因幸那岸觀宮女上火壇殉仁宗葬

戊申大順元年辛卯詔以國哀禁國中不得騎馬 庚子王初

御經筵 以武衛黎伯玉爲太尉內人火頭劉波楊珥爲太

傅中丞牟都俞爲諫議大夫 癸卯使賫書於宋訃仁宗之

喪及告以王初卽位時宋高宗避金人已渡江都臨安矣

真臘寇乂安州 乙丑上尊號曰順天廣運欽明仁孝皇帝

庚午王御天安殿盟國人於龍墀 六月以王生日爲瑞天
節 立后三尊義母宸妃爲太后 二月眞臘冠義安命太
傅阮平公討之擒其將而還

己酉大順二年春正月設慶成八萬四千寶塔會於天符閣

甲午尊父崇賢侯爲太上王母杜氏爲太后居洞仁宮 秋

七月仁宗靈位燈生兩燄 青竹蛇蟠於寶辰

庚戌大順三年夏五月獻白雀 太上王薨諡恭王 六月旱

禱而雨 占城來貢 競渡 遣使於宋

辛亥大順四年春三月詔家奴不得娶百姓女 宋高宗封王

爲郡王

壬子大順五年春三月黃龍見於麗光宮 秋八月眞臘占城

寇又安州詔太尉楊英珥討克之 阮承恩使於宋

癸丑天彰寶嗣元年春正月改元 二月大明殿延命燈發花

寶幡舞 馬生距 夏六月黃龍見於永光殿 冬十月造

延生五岳觀

甲寅天彰寶嗣二年春二月真臘占城來貢 自春至夏不雨

冬十二月古法堂枯樹生花

乙卯天彰寶嗣三年春正月古銅鐘見 神龜見胸有一天永

聖四字

丙辰天彰寶嗣四年春二月又安州地震江水如血 九月詔

京城內外三家爲一保 真臘將蘇破稜寇又安州命太傅

阮公平擊敗之

丁天彰寶嗣五年夏五月內人午炎獻生金一塊重六十六兩秋九月土不豫薨於永光殿壽二十一在位十年廟號神宗改元者二葬天德府

英宗

諱天祚神宗第二子也母感聖夫人姓黎氏王爲人隆準龍顏仁慈寬恕年方三歲卽位於柩前上尊號曰體天順道睿文神武純仁顯義徽謀聖智御民育物羣靈不應大明至孝皇帝改元以天彰寶嗣五年秋九月爲紹明元年尊號感聖夫人爲太后黃龍飛人城冬十月巳酉黃龍夜自太清宮飛入禁內乙卯盟國人於龍墀

戊午紹明二年夏四月以王生日爲壽寧節宋高宗封王爲

郡王 立后一

已未紹明三年翁申利自稱仁宗之子據上源州以叛僭號平
皇有衆千餘人二月詔諫議大夫劉禹偁擊之爲利所敗利
出據西儂州攻破富良府欲向京師命太尉杜英武討之至
曠驛與利相遇大戰利軍大敗死者不可勝數利奔隆令州
十月英武攻隆令州破之俘二千餘人利奔諒州爲太傅蘇
靈成所擒送京師斬之

庚申大定元年正月改元 二月獻白蟾蜍 冬十二月詔諸

典賣熟田二十年內聽贖之凡相爭田地五十年外不得申
訟諸賣田地已有契不得贖 自春至夏不雨王禱之乃雨

辛酉大定二年秋八月丙寅黃龍夜見於永壽殿後橙樹

壬戌大定三年春二月富良州首領楊嗣明尙韶容公主三
月馬四足生距夏五月太尉杜英武獻白龜牟都俞獻白
雀以都俞爲太師

癸亥大定四年夏四月獻六眸龜胸有以行法公四字秋八

月宋妖人譚友諒入思琅州自號呂先生率衆寇廣源州
構廣慈宮太后居之夏淫雨禱之有驗黃龍見於永壽

殿

甲子大定五年夏四月彗見秋七月造天資庫六所

乙丑大定六年秋八月象放光羣臣上表稱賀九月獻白鴉

太后薨諡昭孝書家阮昭獻白鴉

丙寅大定七年春二月幸蓓仁耕籍田

丁卯 大定八年夏四月王御龍墀觀捕象

戊辰 大定九年春二月獻赤馬生距 秋九月真臘寇又安州

王聽太尉杜英武獄徒英武爲昇田宏初王冲幼政無小大皆委英武而英武又私於太后因益驕恣居朝廷則攘臂厲聲命官吏則頤指氣使衆皆側目而不敢言駙馬楊嗣明等與殿前指揮使武帶率軍士詣越城門外大呼曰英武出入掖庭恣行凶穢聲聞於外臣等請除之毋貽後患因收英武繫於具聖廊太后令人送酒食而密置金以賂帶等時具聖都火頭阮揚言於衆曰汝等欲貪其賂我與汝必不免於英武之手不如殺之以紓吾禍執戈欲刺之左具聲譚乃奪其戈止之曰殿前謂我英武罪雖死必當先稟上命揚怒詬

之曰殿前是武吉非武帶也何其貪人之賂而不顧公議耶
言訖赴井而死英武旣得罪太后憂悶思所以復英武職任
者英武累蒙赦宥復爲太尉輔政如之而寵任益隆由是得
擅禍福之柄常欲思報前怨乃私以百餘人爲奉衛都凡有
罪者悉委本衛都捕之英武密言於王曰往者武帶等擅以
兵入禁庭其罪莫大請除之王可其奏英武遂命奉衛都捕
帶等下吏治之獄成詔降智明王爲侯內侍杜乙等五人上
木馬玉堦火頭八人等斬於西市殿前指揮使武帶等二十
人梟於江頭駙馬楊嗣明等三十人流惡水餘並徒爲田宏
犒甲果如阮揚所言是歲禁閹寺不得擅入宮中朝士不得
往來王侯家諸犯入奉衛都地分者杖八十入廊內者死罪

中書火阮伯獻赤麒麟 夏旱禱而雨

巳巳 大定十年夏五月檳榔一本生二十八株 秋八月王幸廣慈宮觀競渡

庚午 大定十一年春二月獻六眸龜胸有籀文王以八萬四字

夏四月朔地震 五月天雨黃沙 冬十月殿試 占城

雍明疊來朝請王封命王遣阮蒙以兵五千如占城 雍明疊爲占城王

辛未 大定十二年

壬申 大定十三年春正月撞龍山獠叛 大黃山獠儂可來叛

王親征之 九月築園丘壇於城南門以爲郊天之處 占

城制皮囉筆來貢

大定十四年秋八月競渡 大水地震 冬十月歲星犯

太白 十一月占臘來貢 十二月地震

大定十五年春三月天雨黃沙 冬十二月御庫火 米

價騰踴 造御天宮延富閣賞花亭

大定十六年宋高宗封王爲南平王至是又遣外郎阮國

以賫送禮物宋高宗賜王衣帶鞍馬

大定十七年秋杜英武獻白孔雀 冬十月起國威行宮

及孔子祠 十一月起長廊自千秋門至客樓 宋高宗加

王檢校太師

大定十八年夏六月乙未日月相關 詔新定律令若干

條諸殿前使及官職都火頭不得服私家役違者杖八十諸

色人著青衫者杖八十徒爲犒甲諸權勢家不得擅受百姓
色人等 諸王侯夜間不得來往城內諸王侯家奴不得刺
龍形於臂 秩王幸清海行宮 大魚出東步其形如牛

或寅大定十九年夏五月左司阮國以使宋回言臣到宋國見

庭中有銅甌以受四方之音疏臣請陛下倣其制以達天下
之情王然之爲置案於朝廷下令曰有欲言事者裁書投之
旬月之間書疏填滿有暗投無名書一道曰太尉杜英武欲
起兵入宮作亂得書者以告英武英武曰公爲予奏按之久
不得其人英武誣奏曰此必立案之人爲之主以爲然命收
國以及其弟儀下吏治之誣服乃流國以於歸化寨未幾王
欲召國以英武使人以酖送國以曰服此藥可以辟瘴氣國

以知不免服藥而死 冬十月造真教寺 詔以府金塗梵

王帝釋像置天符天祐二寺

已卯大定二十年詔內明字及大僚班稱呼太傅郎將上制崇
班供奉侍禁殿直稱呼太保無官者稱呼管甲祇候火頭稱
呼奉御掃宏呼主都 天符天祐寺柱流血

庚辰大定二十一年起二女及蚩尤祠於布蓋坊 占城來貢

辛巳大定二十二年秋七月起古州法雲寺 太后薨諡靈照

平隆場叛命少師費公信攻破之

壬午大定二十三年詔六十以上爲老劣十七至十九爲第二
等十六以下爲黃男 詔自割勢者杖八十刺左膊二十三
字還本色 仲夏地震 秋造衆仙臺上層蓋以金瓦下層

蓋以銀瓦

癸未政隆寶應元年正月改元 禁天下不得服用假珍珠

五月宋孝宗卽位使賁禮物國書至欽州王遣使迎之

甲申政隆寶應二年春三月重修天安殿 芒貫江弄洛蠻叛

命蘇憲成討破之

乙酉政隆寶應三年春築廣照延命燈臺 秋試學生詔徙朝

東門大羅城却七十五尺築以磚石以避江水衝啗 占城

來貢

丙戌政隆寶應四年春三月幸景靈宮觀浴道浴道禮自此始

六眸玉字綠文龜見又獻六眸紅龜項有赤文腹下具五

色尾端有距 獻白黑孔雀 冬大僚阮恩獻六眸龜胸有

天子萬世萬萬世七字 獻白鴉

丁政隆寶應五年重修大興門 天極公主歸於諒州牧懷

忠侯

戊子政隆寶應六年獻優曇花

己丑政隆寶應七年

庚寅政隆寶應八年季夏迎蟾宮火 占城來貢

辛卯政隆寶應九年罷浴道禮 永光殿無故自動 孟夏詔

修文宣王廟及后土祠 造太白閣 秋七月地震

壬辰政隆寶應十年冬造貞靈夫人祠於西陽橋外

癸巳政隆寶應十一年重修太和橋 宋致書買象以備南郊

鹵簿命大僚班尹子充賚象十頭如宋

甲午天感至寶元年正月改元 宋以我越爲安南國王爲國

王立國號自此始 降太子龍昶爲保國王立龍幹爲太子

龍昶性好色宮中有寵幸者皆私通焉王頗惡其無禮元妃徐氏有寵后乃使昶密傳私情以惑之欲徐氏自此見疏徐氏具以其狀白王因怒廢之一日王出視朝乳母抱高宗從之高宗啼不止王脫冠冠之乃止王奇之曰成吾業者必此兒十一月立爲太子降昶爲王

天感至寶二年秋七月王不豫后請復立保國王王曰爲人子而不敬其親爲人君而能愛其民乎甲辰疾大漸謂太子曰國家山奇水秀人傑地靈珠玉寶貝靡不生焉他國莫比也宜慎守之乙巳王薨於瑞光殿壽四十一廟號英宗在

位三十九年改元者三葬天德府

高宗

諱龍幹英宗第六子也母瑞珠后姓杜氏王方二歲以天感至寶二年七月卽位於柩前尊母瑞珠后曰照天至理太后上尊號曰應乾御極宏文憲武靈瑞照符彰道至仁愛民理物睿謀神智化感政醇敷惠示慈綏猷建美功全業盛龍見神居聖明光孝皇帝王方冲幼政無巨細悉委太傅蘇憲成太后有廢立意伺憲成之出使以金帛賂其室呂氏使語憲成憲成曰吾身居相位受先王顧託以輔幼主今受人之賂而謀廢立天下其謂我何縱使衆人皆塗其耳目而無知者則將何辭以對先王於地下乎太后知其謀之不濟然意終

不改乃召憲成謂之曰公於國家可謂忠矣然公之齒亦已向暮而事冲幼之君公之所爲其誰知之不如立長君則彼將德公之賜而長保富貴豈不韙歟憲成曰不義而富且貴非忠臣義士所樂爲況先王遺囑言猶在耳其如公議何臣不敢奉詔遂趨而出太后乃遣促召保國王保國且驚且喜遂以小舟由蘇厯江而入憲成乃召左右官職都諭之曰先王以吾與爾曹戮力王室無貳厥心故以幼主付託今保國王以太后命謂廢主上而自立汝等宜盡其忠竭其力以聽吾約束用吾命者賞延於世違吾命者顯戮於市汝其勉之官職都皆翕然聽命頃之保國王至銀河門太后召益急保國欲入官職都止之曰未聽詔旨不敢奉命王苟自彊入其

犯之者非我也兵也保國聞之漸懼而退 季秋以太后弟
杜安順爲關內憲國侯以憲成爲太尉 太覽山神光見
孟冬盟國人於龍墀

丙申貞符元年宋孝宗賜王安南國王之印 太尉蘇憲成獻

白雀殿前指揮使黃罔獻白鹿

丁酉貞符二年占城人入乂安州東界 獻六眸龜項有朱文

上源州首領楊倚叛

戊戌貞符三年仲夏以生日爲乾興節

己亥貞符四年孟春地震 仲夏增修真教寺詔以其寺爲英

宗忌辰行香所 六月甲辰兩日並見 己酉太尉蘇憲成

卒輟朝七日清膳三日初憲成寢疾惟參知政事武贊唐夙

夜侍側諫議大夫陳忠佐以事務煩劇不暇存省及疾篤太
后問疾曰如有不諱其誰代之憲成曰平日所知惟忠佐而
已太后曰贊唐曰侍湯藥而公言不及何也對曰陛下問其
可否故臣言及忠佐如問其侍養非贊唐而誰太后雖嘉其
忠竟不用其言乃以杜安順聽政 禁魚鹽鐵器不得至源
頭博易 王與太后觀僧官子弟試誦般若經又御鳳鳴殿
試黃男辨寫古人詩及運算 孟冬文御崇章殿試三教子
弟辨寫古詩及賦詩經義運算等科 戊戌獻三足六眸龜
庚子貞符五年詔三教修大內碑文定王侯入朝例 夏以令
書家阮午爲副行遣 孟秋大水永光會仙二殿地震 冬
以渭龍州首領何公輔尙華陽公主

辛丑貞符六年夏四月熒惑入南斗 大饑民死殆半

壬寅貞符七年春三月以玉堦員外郎蕭汝翼爲評簿司 夏

杜安順進白鴉 以中書火朱遂良爲中書省令書家以杜

安順爲太師輔政時人畏其威凡有獄訟胥吏追不逮者安

順命中車兒追之卽立至時優人戲以一人爲刑部尙書差

胥追獄不至曰汝何不稱爲太師巾車兒乎如其言果獲

冬十二月壬寅王初御經筵 禁不得殺牛不得以黃線縫

衣裳

癸卯貞符八年春蟲結窠于於二林寺木上色如金銀

甲辰貞符九年冬司蒙柵鄭柵烏米柵叛王命太傅王仁慈討

之仁慈以州人范品屯翁仲隘張顏范杜屯沛鄉段松屯可

老仁慈直攻蕩沛萬米二柵拔之至羅鑣寨爲獠所襲官軍
大敗仁慈奔至安檜山陷於寧爲獠所刺而死山獠相謂曰
今日有一婦人爲我所刺亡卒知仁慈已死徧求山澤間果
得其屍仁慈宦官也故似婦人 雨黑水 獻連穗禾藁長
七尺五寸

己貞符十年春建寧王龍益帥兵一萬二千餘人伐靈柵山
獠以報羅鑣之役軍於杜家村使招諭之首軍丁武官卽丁
創等皆降龍益盡擒之武等哀叫從人阮多錦以武等旣被
拘囚必當恐懼遂詬辱之而溺於口獠性兇悍遂嚙其陰莖
多錦以手擊之武失口多錦亦仆地幾死於是龍益使官職
作木魚箝武等口杖殺之而脯其屍 季夏暴風大起二寺

門地裂

丙午貞符十一年夏四月獲白象賜名天資象乃改元爲天資
嘉瑞元年 駙馬郎保貞侯杜直獻玄鹿

丁未天資嘉瑞二年仲夏太廟震 秋西域僧至王問其所能
曰能降虎王命祇候奉御黎能長館之遣人捕虎以試其術
旬餘僧謂能長虎可伏矣能長以聞王命築檻於永平閣使
僧入檻僧方禹步誦呪向虎前以杖扣其頭虎格執其杖僧
因奏曰有惡人解臣呪術請復加持然後行之王從其請僧
復加持久之王欲窮其術一日命僧復入檻虎乃跳梁搏噬
僧恐懼退却莫知所爲倚檻而死 仲冬熒惑見

戊申天資嘉瑞三年春二月丁卯朔日有食之 獻白鴉 夏

造聖儀宮 季夏地震 大暴風 太師杜安順卒以太傅

吳履信輔政 秋古宏甲叛

配天資嘉瑞四年春二月朔日有食之 夏日月色赤如血

地震 王命太傅吳履信都官郎中黎能長按少師莫顯

績訟能長等畏顯績不敢推究國人嘲之曰吳輔國是蘭黎都官是擊按一訟莫績但跼蹐而已時王尚幼顯績通於太

后故當時畏之蘭擊二狂人名 大俚僧惠明戒日等來朝

戊天資嘉瑞五年春二月太后薨諡靈道 三月地震詔流

莫顯績於歸化寨 太傅吳履信卒以太傅譚以蒙輔政

亥天資嘉瑞六年真臘國來貢 以都官郎中黎能長爲左

輔鄧秀父爲叅知政事 冬十二月熒惑犯太白

壬天資嘉瑞七年春正月清化古宏甲叛初甲人先見牛跡緣於菴羅樹尋跡視之見白牛在樹上復以他岐而下入於江中因忽不見州人占曰牛在下之物而在木上乃下而在上之象因相率以反是夏詔譚以蒙發清化府兵擊古宏甲以蒙命多伐蕉江中以礙賊船賊縱橫不復成陣以蒙急攻大破之擒其長黎晚等檻歸京師詔晚等上木馬冬十二月迎蟾宮火疏蘇厯江築石塘演州胡蝶叛以蒙討擒之

癸天資嘉瑞八年

甲寅天資嘉瑞九年春真登州首領何黎叛命譚以蒙討擒之仲夏永壽殿金龍頭發光秋七月以金銀塗梵王帝釋

像安置於二寺 設競渡宴禮於後宮 冬觀魚於晦是日

雨雹大如馬頭死者甚衆 占城真臘來貢

乙卯天資嘉瑞十年春二月王御大興門設廣照燈會已巳御

天安殿設春筵宴禮 地震 五月地又震 真臘來貢

大疫

丙辰天資嘉瑞十一年孟秋戊寅明離閣震 孟冬試三教子

弟辦寫古人詩運算賦詩經義等科賜及第出身有差

丁巳天資嘉瑞十二年春三月幸龍水海口造迎蟾宮及行宮

百餘所 秋詔國子入學 進譚以蒙爵爲列侯

戊午天資嘉瑞十三年譚以蒙言於王曰方今僧徒頗與役夫

相半自結伴侶妄立師資聚類羣居多爲穢行或於戒場精

舍公行酒肉禪房淨院私自姦淫晝伏夜行有如狐鼠敗俗
傷教漸漸成風此而不禁久必滋甚王可其奏以蒙召集境
內僧徒留於穀倉度其知名者數十人爲僧餘悉涅手還俗
王幸錦潭觀魚 秋左武勝廊震 王御天慶殿治判上
林院獄 孟冬輔國太傅譚以蒙決都護府獄於晝關外
涼州產白錫綠銅大青

己未天資嘉瑞十四年春二月王幸清化府觀捕象 夏地震

秋省試學生 後宮火 以蒙獻白鴉白雀

庚申天資嘉瑞十五年仲春王幸玉山寨觀捕象 季夏地震

秋設競渡燕禮

辛酉天資嘉瑞十六年

壬戌天資寶祐元年春正月改元羣臣請王加尊號夏六月地震冬十月王幸海清行宮每夜則命樂工彈婆魯唱調擬占城曲其聲清怨哀切左右聞之皆泣下僧副阮常曰吾見詩序云亂國之音怨以怒其政乖亡國之音哀以思其民困今主上巡遊無度政教乖離下民愁困至此愈甚而日聞哀怨之音無乃亂亡之兆乎吾知車駕此還不再幸其宮矣後境內大亂果如其言

癸亥天資寶祐二年正月造新宮於寢殿西中置天瑞殿左起陽明殿右起蟾光殿前安正儀殿上構敬天殿堦曰麗瑤中啟永嚴門右啟越城門堦曰銀虹後啟勝壽殿上構聖壽閣左構日金閣右構月寶閣周圍設廊廡堦曰金晶月寶閣右

置涼石座閣西起浴堂後構富國閣堦曰鳳簫後起透垣門
養魚池池上構玩漪亭亭三面樹以奇花異木池水通於江
其雕飾之工土木之麗古未有也初敬天閣成有鵲巢其上
而產雛羣臣因之諫曰昔魏明帝始構凌霄閣有鵲巢焉高
堂隆曰詩云維鵲有巢維鳩居之今宮室初成而鵲巢之臣
愚以爲有異姓居之臣願陛下遠鑒高堂隆之言先務克己
修德後乃興其工役可也王默然良久以問宦官范秉彝范
秉彝曰閣成而鵲巢有產其雛者此天錫陛下本支百世之
休徵也王悅命促修之百姓由是益困 秋七月知又安州
殿前指揮使杜清及州牧范延等上言占城國主布池爲其
叔布由所逐以備瀾二百餘隻載其妻子寓於几羅海口欲

以求救八月王命輔國太傅譚以蒙樞密使杜安等往議其事以蒙至几羅杜安曰布池有船二百隻狼子野心不可盡信諺曰蟻孔潰隄寸煙燎屋今布池之衆豈特蟻孔寸煙之謂也願公思之以蒙以語清延使爲之備清延曰彼以難而求救於我宜推誠相恤今乃反見疑貳無乃不可乎以蒙怒遂引軍還清延相謂曰我等已忤輔國之心必有後患不如反襲布池以爲自全之計謀泄反爲布池所覺池懼乃謂其衆曰我等以難而來求救於大國旣無卹鄰之義反欲虜我爲囚痛莫甚焉因伺間以誘清延清延使乂安人繫舟於占城備瀾以守之占城人夜以竹炬置槍匿船中一夜守者疲困撤備而卧占城因燒火炬投於其舟守者驚起莫知所爲

皆投於水爲占城所殺及溺死者二百餘人清延軍大潰而布池率衆亡歸其國 九月大黃人費郎反先是大黃人築大城門聞林邑陀某邑已叛遂率衆逃歸而反 上將軍阮保良吏部尙書徐英珥劾奏以蒙蠹國害民莫此爲甚詔降以蒙爲大僚班初保良造聖日閣稽期以蒙怒命笞之保良佯爲痛甚不能起以蒙叱起之保良曰杖痛如此安能起乎中心積怨 乙未以祇候奉御陳馨爲元師領兵討大黃仍命吏部尙書徐英珥率清化府兵以討之 甲寅英珥次路沛江口陳馨與費郎遇兩軍交戰英珥救之皆敗爲郎所殺子甲天資寶祐三年命輔國太保杜敬修討大黃敬修怯懦不敢深入乃屯於越灣分軍進攻諸道而敬修但往來章山安

老間而已又上書言盛夏暑熱師老糧絕王乃召還 五月
又命關內侯杜英允討之又不可引退 黃龍見於聖日閣
八月又見於聖壽殿飛繞御寢門及於天瑞殿御座遺爪跡
殆百餘所又見於後宮者三引其宮女黎娘置於殿頭 十
月命以蒙將諸道兵築壘自婆溝徑以北沿路江口抵文雷
寨以禦大黃人 大風

丑天資寶祐四年初以蒙築壘成作樓船數十艘命富良弩
手居其上以長索繫船尾令之曰賊至則撐船過江而射之
如有不利則挽其船以回及以蒙被召還京大黃人率其黨
屯於北岸戍人如以蒙所教大黃人岸上鼓譟挽船卒見其
勢甚盛各自驚怖棄索而走船薄賊岸而弩手盡爲所殺官

軍大潰費郎等恃其數勝遂率志士蠻獠官鎗等攻拔一帶
鄉村焚應豐行宮及倉穀部落屋宇殆盡後至蜺洞爲洞人
邀擊大破之 秋八月王命侍衛都火頭阮謂往招諭大黃
人謂至費郎與其豪長一百七十餘人出降 九月壬辰改
元爲治平龍應元年是月覽山崩 黃龍見於勝壽殿 天
瑞殿成賜羣臣三日燕以落之王頗徇於貨利以賣官弼獄
爲事諸兩人相爭田地產物而一人進納者不問其情理曲
直皆以沒官故府庫財貨山積而百姓咨怨盜賊蠭起
丙寅治平龍應二年春正月王御敬天閣觀拋飛團 二月壬
子朔日有食之 三月奉天宮火 夏五月造聖勲詩 冬
十月重修真教寺 是歲境內旣亂而王頗好遊幸道塗梗

阻無所可適乃於應明池別爲應豐海清行宮日率近臣宮女以遊觀爲樂又以巨舟爲御船以小舟爲兩隊使宮女伶人發撓而引其左右以倣行幸之儀又以蠟封匹帛及海物之類沉於池中令人入水取之以爲龍宮所獻羣臣見其遊蕩無度皆畏懼莫敢言伶人武高詐謂上品奉御鄭寧曰適高過透池邊見一異人執手遵池而行至菴羅樹下忽引入水高懼其溺不敢前頃之水忽自裂行至一處見其宮殿顯敞侍衛甚嚴高問是誰所居其人曰卽吾所居以管攝此池也遂具杯盤與高對飲酒闌高謝求歸其人惠以檳榔送至菴羅樹下因忽不見其人而手中檳榔已化爲石矣乃知池中有神物也寧驚異具奏於王王雖聞其言略無畏懼乃

使以鐵厭之至冬月池水涸王謂左右曰有能以江水漲溢於此者吾必厚賞佞臣陳宿曰臣能之王以爲然使行其法竟不驗一日王幸於此池聞城外有爲剽掠者所叫而尙耽於遊逸佯爲不聞王性畏雷每於動止之間便生驚怖近臣阮餘自言有降雷之術會雷鳴命餘降之餘仰天誦咒而雷聲愈厲王詰之餘曰臣戒之久矣豈意彼猶強暴如此

丁卯治平龍應三年大黃人費郎復反攻雜字邑 三月國威

州賊段可列王滿反 夏四月譚以蒙復輔政 秋八月段

尙段主反王命大發兵攻之譚以蒙出大通道保貞侯出南冊道上品奉御范秉彝出可了道祇候火頭陳馨出扶帶道欲會攻尙尙密遣人賂上品奉御范猷請以其衆歸猷猷爲

力請於王王遣使召以蒙等軍還尙遂得脫自是以蒙秉彝與猷有隙是歲王見盜賊蠭起乃追悔前過因下詔曰朕幼膺大業深處九重不知民事之艱難自納小人之言以取怨於下民旣胥怨朕將疇依今其改過自新與民更始諸有地產業之沒於官者悉還之

戊辰治平龍應四年大饑餓死者相枕 冬十月大水 十二月宋祿州人韋智剛攻諒州 以范猷知又安州軍事猷言於王曰方今天下擾亂姦賊輩起或有與臣妬寵私爲暴亂雖臣之首領不能自保況陛下之恩德乎願少加聖慮容臣使得選其壯勇以自備庶免不虞之禍王然之於是猷乃招納亡命鳩聚盜賊號曰候人公行劫掠無所忌憚盜賊因之

蠡起而國威人亦率其徒屯於西結文雷寨人屯於拖幕江
自此道路阻絕舟船不通王命上品奉御范秉彝將藤州人
禦之而猷又歸古蔑鄉與烘人尙主等會攻藤州藤州人請
秉彝攻猷不克乃還

已治平龍應五年春正月秉彝復師藤人快人攻猷秉彝數
敗秉彝怒斬其走者以徇它日復戰克之猷奔於烘秉彝籍
其家而焚之猷與秉彝愈增怨惡猪洞人阮破鄰領其部
曲夜盜隊舍官府財物宋韋智剛復攻諒州戌時日夜
見三月日晷忽冥移時復見丁未秉彝又攻烘人尙主
於衛橋烘人潰主陷於寧爲何文雷所刺王命祇候奉御
陳馨徵猷歸京師秋七月秉彝至京師將入奉事有止之

曰王旣先入猷言怒公未解秉彜曰吾事上盡忠而反爲人譖耶況有君命吾其焉逃遂入王使執之及其子輔囚於水院欲加以刑其將郭卜等聞之領兵鼓譟而入至大成門爲閹者所拒卜等刮其扉而入王聞事急促召秉彜入金晶堦涼石處俄而猷與其弟京等皆自御堂出以御槍殺秉彜及輔卜等聞秉彜死遂使軍士突入涼石處以王所御巾車舁秉彜屍以御席裹輔屍由越城門出下朝東步旣而復入萬延宮逆王子忱王子昂歸於海邑壬寅我元祖大帥舟師詣京師逆王子昂并母元妃譚氏及同母妹二人歸於海邑段氏家遂於其家奉王子忱卽位時昂家臣劉紹就元祖及遙濠人范愚言曰忱雖長子庶也昂雖少嫡也唯二公圖之元

祖遂與愚逆昂歸茫仁卽位徽稱勝王降忱爲王頃之昂復歸於海邑寓劉家村館以我元祖仲女爲元妃以譚以蒙爲太尉阮正吏爲叅知政事元祖爲明字愚爲上品奉御蘇忠嗣爲殿前指揮使餘各有差 王命猷往烘路訓練軍士欲伐順流人會烘人來迎及期而猷尙與天極公主私不覺移時遂與烘人相失猷乃登舟由江路而去次古州步陸行至麻浪阿果社爲北江人阮耨阮乃所執送於王子昂殺之

秋八月順流快以秉彝之死大率舟師攻京師前軍泊於東步由左掖門直入禁中盜取寶物大軍泊天河步欲從千秋門入至雨師觀爲列侯高舸伏於軫圍射一卒中乳舸爲之撫掌誼譟士卒奔北而還船人疑有官軍來攻皆撐舟離岸

遇北風疾吹盡爲漂散二軍聞舟船已失皆自奔潰京城人追殺之死者三百餘人

庚午治平龍應六年春正月勝嚴寺地裂蘇忠嗣自以私受

王子昂封爵恐罪及已乃勒兵攻快人因就海邑執王子昂等歸於京師丁未王命上品奉御杜廣如忠嗣家逆王子昂王子昂署官者皆逃去以蒙竄於安朗鄉因與其屬謀捕諸受王子封爵者以贖其罪因移檄募諸道兵分爲五隊以攻之以蒙領茄人及清化府人攻卽墨鄉爲其所敗於是諸道兵聞之皆引退秋七月以蒙收所受王子封爵者二十八人以獻杜英允當門數之曰汝爲國大臣旣懷無君之心私受賊子封爵今反與吾並列吾雖不才復何顏與汝相見以

蒙慚懼而退 彗星出 冬十月王不豫壬午王寢疾忽見
二青衣執杖立座側王問執杖者爲誰左右曰無所見是夜
王薨於勝壽殿年三十七廟號高宗在位三十六年葬天德
府壽陵改元者四

惠宗

諱晃昂高宗第三子也母元妃譚氏以治平龍應六年十月
卽位於柩前尊號曰資天統御欽仁宏孝皇帝尊母譚氏爲
太后同聽政十一月殯高宗於崇陽殿王與太后及羣臣皆
除服 己酉順流明字陳嗣慶帥舟師次細江步請其舅蘇
忠嗣同赴高宗之喪忠嗣亦相疑貳嗣慶乃回軍 是月王
使迎陳仲女嗣慶不應 以太傅杜敬修爲太尉 十二月

祇候奉御杜廣等執敬修送於忠嗣沉之大通步以敬修謀
殺忠嗣故也 丁巳忠嗣聞關內侯杜世規與祇候奉御杜
廣小侍衛人火頭費例謀廢立因引軍至興聖菴遇廣例欲
襲之以廣例軍衆乃陽與謀曰主上初喪民情未定盍各屏
兵甲自詣朝省同謀協力以匡王室不亦善乎廣例以爲然
遂許諾會日暮約以明早是夜忠嗣更增軍士多於前日欲
圖廣例明日廣例如約先會於秘書閣以待忠嗣忠嗣至四
達亭先遣裨將陶判將兵由右掖門入屯沙墀龍墀使阮字
阮拖羅屯千秋門時例方飯見列侯高舸命之食舸曰事急
矣食可乎例問故曰忠嗣軍士倍於前日欲圖子矣例乃投
箸而起執戈就龍門窺之見陶判軍鼓譟而入例進擊殺一

人退保門內又聞千秋門有屯軍遂由越門出延具門爲判
軍所追例以戈擊之又殺一人判軍少止例至千秋門遂脫
判引軍襲世規世規竄於高宗柩下求之弗獲忠嗣執其守
殯闔豎問世規所在豎猶畏世規乃佯以手加額而指之隨
指而求乃獲世規忠嗣命斬於東市先斫二脛次解胸脊及
臂世規神色自若後剖其腹乃死是日忠嗣收小侍衛人譚
入殺於長廣門外以入附於王子忱杜廣亦殺寄班武利於
門外 巳未以忠嗣爲招討大使譚以蒙爲太尉 辛未詔
斬杜英允尹亭阮元阮仁於封坡 進以蒙王爵
未建嘉元年春正月王復使迎陳仲女嗣慶不應 乙丑選
文臣爲都護府士師 癸酉復迎陳仲女嗣慶使內殿直馮

佐周與其裨將潘隣阮硬送仲女於京師會忠嗣與廣戰於
朝東門乃泊於大通步 己卯忠嗣假兵於隣硬廣軍大潰
閏月獲廣等 庚寅立陳仲女爲元妃 辛丑王與太后御
景延門聽杜廣訟廣等七人皆斬 三月以招討大使關內
侯蘇忠嗣爲太尉 夏四月葬高宗 阮字偏將阮眘告忠
嗣曰字欲殺公女壻阮麻邏因而反忠嗣怒奪字兵權字懼
奔國威 六月忠嗣夜如嘉林第與天極公主私通爲其夫
關內侯王尙所殺時字聞忠嗣已死乃還京師夜帥部黨盜
御府貨物王怒詔捕字甚急字竄於枯柵山獠數月衣食窘
乏將謀歸嗣慶至灘邑邑中父老遮道請留曰此地困於山
獠久矣明公苟能少留則一帶邑皆蒙全活其德公者不少

字乃決意居之大會邑人屠牛歃血而盟喻以利害衆皆許諾字以其得衆乃引兵攻破山獠斬首而還又爲莽人數十餘各執火炬夜置山獠柵使人守之戒曰汝見山獠屋火起則速燃其炬而誼譟夜半使阮局焚山獠屋守者見火發亦燃其炬而譟山獠驚起倉皇欲拒戰疑前後兵衆不敢出俱向柵前而射又恐字引兵至乃降自此一帶郡縣皆爲字有阮麻邏以忠嗣之死往說我太祖請進兵安輯快諸邑麻邏與其妻蘇氏登舟欲如順流道遇忠嗣將阮貞爲所殺遂虜蘇氏以歸蘇氏使人訴於太祖太祖怒貞非義遂謀圖貞嗣慶葬忠嗣於穫鄉太祖次海邑使召貞貞不至乃使蘇氏誘以殺之 烘人攻黃點隘嗣慶使賴靈率兵與快將阮堂拒

之堂爲守隘人所擒以致於烘嗣慶怒決江水灌諸邑而還
快人失望歸附於烘尙與文雷乃譖嗣慶於王曰嗣慶將發
兵赴京師欲圖改立王怒秋七月詔諸道兵討嗣慶降元妃
陳氏爲御女 烘人段尙段文雷引兵會師詔進尙侯爵
太傅戶部罷詔譚以蒙復聽政 嗣慶引兵伐麻雷人丁感
敗之而還 冬十月嗣慶復伐其邑先攻隊山殺獲甚多感
奔山獠 烘人攻南冊范武等降之使其將段持耒守之持
耒不能招集其衆爲武所襲殺持耒於芮邑烘人又率衆渡
江攻南冊南冊人竄於奇特山武縊而死南冊人使求救於
嗣慶嗣慶使其將丁瑰將兵擊烘烘人敗走又經略諒州至
三峙山盡有其地十二月嗣慶大發兵次細江步太后聞軍

至疑有廢立意嗣慶乃剪髮誓天又使天貞公主奏言已意無他太后亦不之信太后夜令收仁國王及王子第六郎第七郎並沉於御堂井以杜改立之萌旣而使舁其屍積於琳光宮門外侍臣皆畏太后不敢視惟小官鄭道哭之甚哀曰先君焉往使三子如是乎高宗初薨童有謠曰高宗葬未畢三屍積爲一

申建嘉二年春正月王及太后幸冷涇洲百官就其洲迎駕還宮 順流明字陳嗣慶與阮字會於朝東步誓爲刎頸交盡忠報國共平禍亂乃分大江之兩岸各自統率自上塊至那岸沿北江道及陸路鄉邑屬於嗣慶自京岸至烏鳶屬於字期以三月會攻烘人 庚戌進嗣慶侯爵諡彰誠 以太

后弟譚經邦聽政

嗣慶還細江步

丁瑰攻諒州降之掠

天極公主家財物而去

二月字攻吉利人吳賞于武高爲

流矢所中乃還居西陽巷旬餘誤與婦人合毒氣復發而卒

王使人招撫其衆爲其佐阮局所殺王大怒自將討局于西

陽城外至普喜巷官軍大敗失王所御寶劍王策馬而還至

審作巷乃脫王與太后幸東岸大僚班杜賞第欲幸諒州嗣

慶聞之乃引軍至京師使其將賴靈潘鄰等兵至賞第迎車

駕還宮王驚疑是夜幸諒州靈鄰等執鞚叩頭請留乃止明

日彰誠侯陳嗣慶次東岸步迎之乃還駐駕於慈調步嗣慶

使人洒掃聖儀宮車駕居其宮王與太后詣佛前誓曰朕以

菲德忝嗣瑤圖致遭亂離將墜前業以至宮駕屢爲播遷今

欲遜於天位以讓賢德言訖引刀欲剪其髮嗣慶及羣臣皆叩頭流涕乃止 庚午車駕還宮 彰誠侯嗣慶次於鶴橋是日命文武百僚皆聽命於彰誠 夏四月嗣慶攻烘人於池邑 冬十二月譚經邦等以內明字尹信劾罪狀聞於嗣慶嗣慶怒發兵傅龍城使殿前指揮使阮硬將官職都入禁中大呼曰信翊阿諛上意瀆亂國經出入樞庭不明名分臣請除之母汙清議信翊大懼乃竄於香閣上硬突入捕送於嗣慶繫鐵索五重送於美祿館

癸酉建嘉三年春正月太后密遣小侍衛火頭王常徵扶樂道將潘世北江道吳乃等約以是月甲寅共發兵襲嗣慶甲寅常世等進襲嗣慶軍於大興門外欲因之遂入後宮擒其母

蘇氏范市知其謀乃潛將蘇氏踰城登舟而遁時軍中不設備見乃至皆奔潰嗣慶在大通步不之知 辛酉嗣慶引軍入禁中焚翫蟾橋回軍大通步 嗣慶使人如北江召其將阮嫩嫩至繫以鐵索五重 壬戌王命上塊營太尉王以蒙及烘俟段尙皆來會王命尙及以蒙攻嗣慶 二月王自將擊嗣慶於米所 嗣慶攻國威州降之 三月王與太后還聖儀宮 乙丑嗣慶縱信翊歸京師因厚賂而謂之曰公此歸善爲吾言於兩宮明其始終臣節勿聽小人之言使予得以保全性命信翊至京王問嗣慶信翊言嗣慶有篡逆之心王與太后益忌之 庚午王太后還大內 夏四月王命以蒙往井州 三帶江諸軍以攻嗣慶 五月丁卯越城門震

六月正儀殿震

秋七月以尹信翊復爲太傅進侯爵

南冊人范以等擊丁瑰走之

九月嗣慶開阮嫩鐵索嫩爲

人狀貌瑰異襟量侔儻雖居縲紲神色自若見勇士跳距帶鐵索跳之過於勇士嗣慶見而異之復以爲將以母姨之女妻之仍授以神溪个屢二邑嗣慶將丁瑰反嗣慶執而殺之

甲戌建嘉四年正月彰誠侯嗣慶會諸道兵盟於東扶列杜太

尉祠欲攻京師嗣慶分水陸二道潘鄰阮嫩將國威兵由平

樂道攻陸路嗣慶自領舟師次拖幕江我太祖及嗣慶攻瀘

江右岸陳守達陳獻琛阮硬攻瀘江左岸王犁阮改攻朝東

步浮梁王自將討嗣慶會大霧黑昏舟人莫辨至米所遇犁

改軍未交戰犁改鼓譟勒兵官軍自潰軍士皆棄舟登陸而

走犁改獲龍舟我太祖欲進攻瀘江右岸至安沿步遇譚以
蒙及安仁王領北江道諸軍來悉以銳師逆戰二軍皆敗守
度獻琛等乘勝進至慈調步又克之隣等遂至榔市遇烘將
段禁武忽等擊之皆敗走度東步浮梁而歸時王在茶亭聞
諸軍皆敗大懼命駕入禁中迎太后共上船欲奔諒州當過
天德大室以蒙勸哭止之曰諒州道路遼遠地多瘴氣非其
所安今陛下避難而適彼譬如逃熱而趨火有何益乎願少
留於此使臣等率烘人復與彼戰以爲後圖萬一不利然後
行幸亦未爲晚王從之以蒙召烘人不至因奔於烘上深以
爲憂已卯幸諒州車駕至芮曳鄉阮順第少歇是夜又行至
多感鄉鄭農家農進膳食畢又去宿朱麻洞陶年第嗣慶在

鶴橋分命將帥招撫諸道新集兵賴靈守義住潘鄰守超類
守度守朗隘范茹守貧隘阮嫩守北江時守度遇烘人段尙
段文雷段可如兵與戰烘人奔北王聞嫩守北江遂命安鐵
將申長申荑等拒於芮曳原並爲嫩所殺王乃與太后奔於
牧寓關內侯王尙第數日嗣慶乃剪髮使人以獻於王及具
言已意謂臣見羣小在側壅遏忠良蔽惑聖聰民情鬱抑無
由上達故因國人之怒起兵以討此輩翦除禍根以慰衆心
耳至于君臣之分不敢少犯豈意深負專征之罪致使車駕
播遷自揆臣身罪當萬死願陛下少霽威怒返駕京師以副
人望王不省嗣慶又使譚經邦率百官備法駕迎王還京
王欲從之羣臣皆喜信翊言於太后曰彼人久蓄異心欲設

計以俘囚耳何謂迎耶願陛下再三思之太后然之明日王命駕還入白太后太后曰王以國家之重不得不歸老母將何歸乎王知太后無還意遂與之幸古弄經邦等皆遮道攀馬首涕泣曰京師方所觀望也舍此不歸欲將何往又曰臣觀嗣慶之心忠赤無二陛下何疑焉王油然下駕謂羣臣曰國家不幸遭此多故今太后遠涉艱險朕其敢離朝夕之省問哉促駕而行時扈蹕者多散去唯內侍判首陳欣等三十人與俱王與太后登舟幸三峙山寓黃伍舍久之以水土不便乃退次湯步是夜稅駕於象奴村二月辛未車駕入鳳山旬餘復還南冊 戊申彰誠侯嗣慶召諸王及百官議改立乃使人迎英宗子惠文王赴鶴橋立之 是日收太后族譚

經邦等並加鐵索囚於美祿

癸亥盟國人於龍墀三月惠

文王卽位於天安殿改元乾寧號元王是日大雷雨

洪人

段軟攻北江東定山東究人不設備見軟來以爲大軍齊至
遂大潰軟素勇悍得勝益驕遂焚屋舍殺掠雞犬殆盡因解
甲登山寺撞鐘爲樂時諸寺戍人皆撞鐘嫩聞鐘以兵邀而
擊之殺軟等嫩乘勝追之至法橋爲烘人段宜伏於橋下以
戈擊之透鐵甲傷背引兵而退初嫩以東究與烘接境恐烘
人掩襲救之不及預戒戍卒曰見烘人則各撞寺鐘以爲警
急令嫩聞而來救至是軟誤撞寺鐘故爲所敗 夏四月甘
蔗將軍潘具反嗣慶囚之於美祿甘蔗將軍杜備反嗣慶使
潘隣捕之爲其所敗復使賴靈往救之又敗太祖以二軍之

敗乃自將擊之不克而退 北江阮嫩反嗣慶因歸其妻嗣慶殺義信王於窖潭以其與嫩通謀是日嗣慶發兵略官府金銀貨物因迎元王赴利仁行宮使賴靈焚京都宮室十九所 嗣慶次大通步築壘於義佳 嗣慶將潘隣欲舉兵應嫩謀泄嗣慶斬於大通州 六月嗣慶攻嫩於聖儀宮焚其宮 丙午王與太后自南冊回宿於太室是日以北江道將軍阮嫩爲侯 丁未至大內太后密詔扶樂道將軍潘世誘烏金侯阮八殺之擊八傷頰賴上卒急救遂免 秋七月戊辰詔築壘自萬春城門至葢市以禦嗣慶 八月北江侯嫩攻烏金侯八於西陽橋 己酉嗣慶使譚弼獻土物 九月嗣慶使阮硬送經邦還京師具言已意無他王聞硬至益懼

遂幸番琴巷尹播家硬去乃還宮 壬寅試僧官子弟 癸
未左輔阮正吏擅取武庫器械詔捕之正吏懼奔北江 丁
亥嗣慶引兵犯闕王與太后幸兵會是日嗣慶縱軍士虜御
府財物因焚其宮室及京城人家殆盡 己未王與太后還
京師見宮室盡爲焚蕩遂次泰和橋側祝聖祠使築茅屋居
之

紀建嘉五年春正月詔曰陳嗣慶聚兇黨寇攘京師水陸戰
攻痛關宗社爰於去冬虐燄逾熾率彼師徒肆行貪虐虜掠
我財物焚蕩我宮室以至京城巷陌化成灰燼朕因億兆臣
庶之怒賴一祖六宗之靈躬舉六師親行征討咨爾將帥之
衆士卒之徒咸聽詔言各盡乃心用塞朕意 嗣慶引軍屯

究連分其將士屯九臯究翁以禦嫩仍遣快路將軍阮堂阮
毗守地民堂毗復與嫩通謀以攻嗣慶嗣慶又使賴靈守安
沿扶列自往攻堂毗及嫩王使人攻安沿扶列克之二
月封北江侯嫩爲王義住人朱停以其邑附嫩三月嗣
慶攻快鄉拔之堂與其子吐出降於是嗣慶遣堂毗築黃壘
安喇築安家壘楊慈築公主壘嫩又攻喇及堂毗皆克之嗣
慶聞堂敗乃引兵救之仍使其將守慶獻琛陶判屯於欄橋
攻嫩將費探敗之五月嗣慶以其妹陳三娘妻於堂王
謂羣臣曰朕欲遜於位卿等以爲何如羣臣皆涕泣止之王
不聽乃與太后引刀剃髮是日王自泰和營幸張耕鄧老第
回駕西陽橋紙作巷內寄班杜安宅嗣慶攻大黃軍潰其

將阮堂溺死

秋七月嗣慶焚洞仁宮王使迎靈仁太后神

主歸於祝聖祠

冬十月聽上林院獄

十一月嗣慶送還

平天冠

十二月構草殿於杜安宅

丙子建嘉六年春正月王與太后御草殿視朝嗣慶還金椅

三月雨雹王命捕刼人於機舍巷爲梟將杜乙所擊王命召

乙乙不應命顯信王入討乙乙終不服五月梟將杜芮攻

王戊午王幸外寨因遣使請兵於嗣慶以討芮芮奔於嫩

己巳徒列侯杜芮爲犒甲

甲辰王與夫人陳氏夜如順

流軍歸嗣慶天明遇其將王犁以舟來迎時太后及王子公

主皆遜於烏金嗣慶見王大喜將士皆歡呼鼓舞自是王與

嗣慶決意攻北江王嫩顯信王入烘人段文雷歸化何高等

甲申太后至安唱時嫩高以太后命攻慈廉諸邑皆拔之
庚戌嗣慶起草殿於西扶列其規模一倣大內 顯信王

阮八降

詔明字馮佐周爲招討使

甲辰王次於慈廉命

嗣慶討嫩

詔徒嫩爲兵

秋八月顯信王八反陷兵合邑

將杜細奔丹鳳

冬十二月進我太祖爵列侯馮佐周賴靈

並關內侯以嗣慶爲太尉贊拜不名太祖長子柳爲關內侯

嗣慶長子海爲王又以太祖爲內侍判首每大宴禮賜坐局

天安殿

丁建嘉七年夏四月太尉分諸軍爲六道討嫩嫩引兵出其

不意擊范恩恩軍陷於冷涇潭口爲嫩所殺者五十餘人嫩

乘勝復襲隘道遇太尉軍交戰嫩軍遂潰

王御涼石座聽

范恩敗軍訟貶恩小侍衛人杖八十 仲夏烘人段尚舉衆

降封尚爲王 太尉引兵攻峯州真那其 皆拔之丁卯峰

州諸屬邑皆出降太尉復引軍攻顯信王八克之八奔安樂

柵自此一帶鄉邑悉平 起萬歲山五峰 永壽殿火 孟

冬甲寅夜地震 王觀魚於隊山

戊寅建嘉八年仲春以麻論柵山獠明字白浪爲列侯 孟夏

幸究連州觀捕魚 戊寅幸舊京食荔支 詔諸獄案成先

令審刑院官預加考訂然後聞奏 己未地震 我太祖領

諸道兵圖嫩於北江仍命決其隄以灌諸鄉邑賴靈隨其水

勢攻之嫩軍大潰獲嫩妻子嫩以百餘人退保扶寧是日太

尉引兵至弩驛歇坐戲指木上小枝謂左右曰吾爲君等射

中此枝一發而中衆皆驚服坐頃其驛爲頽壓覆太尉衆大懼撤尾木以出之而太尉無恙以關內侯賴靈知又安州事太祖與太尉嗣慶以其妹陳三娘嫁烘侯段文雷文雷勇敢有智略能得衆心故烘人多歸之七月大水

已卯建嘉九年春二月丙辰雨雹乙丑王聽都護府訟降上

林院士師阮宣及其子鄧分盛爲書家夏六月以劉炎爲

上林院士師乙丑王幸舊京朝東步觀諸軍攻嫩不克

南冊范以卒初太尉使王犁等將兵向南冊與以會謀共伐嫩會以疾篤嗣慶使醫石章往治之未至而卒乙巳嗣慶發兵往南冊道遇犁等還怒其不留欲刑之因使將軍阮改阮木引兵徑至平槁時嫩已先據其邑改木力戰爭之嫩兵自

潰太尉自陸路向安丁橋遇將軍自挑謂嫩兵已傳於安丁
洞太尉使攻之不克太尉復攻平槁南冊將黃个卒阮利皆
出降南冊平仲秋王御長廣門觀秋社冬十二月嫩病
篤太尉軍於朝東步而嫩已死庚午嫩將費探送太后及王
子公主等於太尉以降嫩大將阮盈竄於侍降險林逾五日
自度計窮乃獻名馬以降北江平

庚辰建嘉十年春正月以上品奉御陳豹爲關內侯陳獻琛爲

列侯阮佐時知審刑院事季春雨雹三月後宮震夏

四月太尉嗣慶與太祖等發兵攻歸化寨何高分爲二道太
尉及太祖由歸化江賴靈潘具由宣光江兩道俱進具陷於
澤爲高將阮乃所斬高聞太尉軍四面圍之最急遂與其妻

子俱縊而死自是上源路三帶江等皆平太尉以潘县死國
請追封明信王 六月己未朔兩日並見 仲秋新宮成
冬十一月王幸扶列步觀鬪舟

辛巳建嘉十一年季夏惠文王薨卽元王也輟朝五日清膳三
日 秋九月戊申幸美祿太尉第

壬午建嘉十二年秋八月彗星見於西南方 孟冬王與太后
御天安殿觀太尉子顯道王海納昏禮 九月大水

癸未建嘉十三年春正月太尉使人收寶信侯賴靈靈縊而死

孟冬太尉伐蒙柵山獠 十二月己卯輔國太尉陳嗣慶
卒於扶列第王與太后臨其喪哭之盡哀諡建國王 己丑
地震 是冬虎入諸村邑

甲申建嘉十四年春正月丁未葬建國王於美祿是春以太祖
爲輔國太尉馮佐周爲內侍判首進上品侯陳豹爵爲王諡
顯誠 季秋自上源頭至京師江水赤如血 冬十二月外
塞佛跡山裂長三十丈

乙酉建嘉十五年命太祖討义安州降之 王御大興門觀設
藏鬪詔境內淑女觀之 夏彗星見 六月王遜位於第二
昭聖公主諡昭王尊王爲太上王改元天彰有道 己卯盟
國人於龍墀 冬十二月上王以女王而幼爲憂召馮佐周
謀曰朕以不德獲戾於天絕無繼嗣傳位於女以一陰而御
羣陽衆所不與必致悔亡以吾觀之莫若遠法唐堯近體仁
祖擇其賢者而授之今所見太尉仲子某年雖沖幼相貌非

常必能濟世安民欲以爲子而主神器仍以昭王配之卿等爲朕言於太尉太祖亦未之信左輔阮正吏謂太祖曰阮氏之有國也賢君六七作其餘德遺澤入人也深一旦遽以異姓爲嗣意其試之以觀我何如耳苟因而受之天下必謂太尉實有篡逆之志太祖欲從之上品奉御陳守度曰左輔之言非也假如上王有子反欲遜於二郎揆之於義則不可奉詔今以無嗣欲擇賢而付之此乃上王遠法堯舜之真讓又何疑哉況天位不可久曠而上王遜避之意已決別選他姓爲嗣雖欲不臣事之其可得乎且上王以二郎爲嗣乃天意也天與不取反受其咎願太尉熟思之冬十二月命內侍判首馮佐周內行遣左司郎中陳智宏將內外文武臣僚領龍

舟備法駕赴星置府迎我太祖以是年十二月初一日受禪
卽位於天安殿尊順貞王后爲太后降昭王爲昭聖王后改
元建中太上王與其母譚太后出居扶列寺號惠光禪師以
建中二年八月丙戌薨於善教寺廟號惠宗在位十五年有
奇改元者一曰建嘉凡十五年壽三十三殯於安華府寶光
寺

右阮朝自太祖至惠宗凡八主始庚戌終乙酉共二
百一十六年而亡

附陳朝紀年

太祖

建中元年乙酉

凡七年

天應政平元年壬辰

凡十九年

元豐元年辛亥

凡七年

聖宗

紹隆元年戊午

凡十五年

寶符元年癸酉

凡六年

仁宗

紹寶元年己卯

凡六年

重興元年乙酉

凡八年

英宗

興隆元年癸巳

凡二十一年

明宗

大慶元年甲寅

凡十年

開泰元年甲子

凡五年

憲宗

開祐元年己巳

凡十二年

裕宗

紹興元年辛巳

凡十七年

大治元年戊戌

凡十一年

天定元年己酉

凡一年

太王

紹慶元年庚戌

凡三年

睿宗

隆慶元年癸丑

凡四年

今主

昌符元年丁巳

吳郡志

附校勘記

欽定四庫全書提要

吳郡志五十卷宋范成大撰成大有驂鸞錄已著錄是書爲成大末年所作郡人龔頤滕茂周南相與贊成之時有求附於籍不得者會成大歿乃騰謗謂不出於成大手遂寢不行故至元嘉禾志序謂吳郡志以妄議不得刊也紹定初廣德李壽朋始爲鉅版趙汝談爲之序以周必大所撰成大墓誌定是書實所自爲并申明龔頤三人者常爲成大蒐訪故謗有自來其論乃定壽朋又以是書止紹興三年其後諸大建置如百萬倉嘉定新邑許浦水軍顧逕移屯皆未及載復令校官汪泰亨補之自謂仿褚少孫補史記例然少孫補史記雖爲妄

陋猶不混本書泰亨所續當時不別署爲續志遂與本書淆亂體例殊乖其書凡分三十九門徵引浩博而敘述簡核爲地志中之善本刊版久佚此本猶紹定舊槧往往於夾註之中又有夾註考成大以前惟姚宏補註戰國策嘗有此例而不及此書之多亦可云著書之勑體矣

原序

初石湖范公爲吳郡志成守具木欲刻矣時有求附某事于
籍而弗得者因譁曰是書非石湖筆也守憚莫敢辨亦弗敢
刻遂以書藏學宮愚按風土必志尚矣吳郡自闔廬以霸更
千數百年號稱雖數易常爲東南大都會當中興其地視漢
扶馮人物魁倬并賦蕃溢談者至與杭等蓋益盛矣而舊圖
經蕪蔓失考朱公

長文

雖重作亦略是豈非大缺者何幸此

筆屬公條章粲然成一郡鉅典辭與事稱矣而流俗乃復掄
阨使不得行豈不使人甚太息哉紹定初元冬廣德李侯

壽

朋以尚書郎出守其先度支公

嘉言

石湖客也是以侯習知

之及謁學問故驚曰是書猶未刊邪他日拜石湖祠退從其

家求遺書得數種而斯志與焉校學本無少異侯曰噫信是已吾何敢不力而書止紹熙三年其後大建置如百萬倉嘉定新邑許浦水軍顧逕移屯等類皆未載法當補於是會校官汪泰亨與文學士雜議用褚少孫例增所缺遺訂其訛譌

書用大備而不自別爲續焉侯喜曰是不沒公美矣亦吾先人志也書來屬汝談序余病謝弗果侯重請曰吾以是石湖

書也故敢憫子而子亦辭乎余不得已勉諾客有問余曰或疑是書不盡出石湖筆子亦信乎余笑曰是固前譁者云也昔八公徒著道術數萬言書標淮南通典亦出衆力而特表杜佑自古如呂氏春秋大小戴禮曷嘗盡出一手哉顧提綱何人耳余聞石湖在時與郡士龔頤滕茂周南厚三人者博

雅善道古皆州之雋民也故公數咨焉而龔薦所聞於公尤多異論由是作子盍亦觀益公碑公墓乎載所爲書篇目可攷子不信碑而信誕乎且公蚤以文名四方位二府余鄙何所繫重余特嘉夫侯之不忘其先能畢力是書以卒公志而不自表顯焉是其賢非余言莫明也抑余所感則又有大此者焉方公書始出也疑謗橫集士至莫敢伸喙以白曾未四十年而向之風波息滅漸盡至是無一存者書乃竟賴侯以傳是不有時數哉然則世論是非曷嘗不待久而後定乎此余所以重感也余誠不足序公姑以是寄意焉其亦可乎否也疑者唯服侯父子世儒有聞其治吳未期百墜交舉旣上此職方氏將復刊石湖集與白氏長慶並行而改命漕湖北

矣余故併志以申後觀焉紹定二年十一月朔汴人趙

汝談

吳郡志目錄

第一卷

沿革

分野

戶口稅租

上貢

第二卷

風俗

第三卷

城郭

第四卷

學校

第五卷

營寨

第六卷

官宇

倉庫

場務附

坊市

第七卷

官宇

第八卷

古蹟

第九卷

古蹟

第十卷

封爵

牧守

第十一卷

牧守

題名

第十二卷

官吏

祠廟

第十三卷

祠廟

第十四卷

園亭

第十五卷

山

第十六卷

虎邱

第十七卷

橋梁

第十八卷

川

第十九卷

水利

第二十卷

人物

第二十一卷

人物

第二十二卷

人物

第二十三卷

人物

第二十四卷

人物

第二十五卷

人物

第二十六卷

人物

第二十七卷

人物 烈女附

第二十八卷

進士題名 武舉附

第二十九卷

土物

第三十卷

土物

第三十一卷

宮觀 府郭寺

第三十二卷

郭外寺

第三十三卷

郭外寺

第三十四卷

郭外寺

第三十五卷

郭外寺

第三十六卷

郭外寺

第三十七卷

縣記

第三十八卷

縣記

第三十九卷

冢墓

第四十卷

仙事

第四十一卷

仙事

第四十二卷

浮屠

第四十三卷

方技

第四十四卷

奇事

第四十五卷

異聞

第四十六卷

異聞

第四十七卷

異聞

第四十八卷

攷證

第四十九卷

雜詠

第五十卷

雜志

校勘進士何漳府學學諭劉九思

校勘迪功郎新廣德軍軍學教授李起

校勘從事郎充平江府府學教授汪泰亨

校勘國學免解進士李宏

吳郡志目錄終

郡志卷一

守山閣叢書 史部

宋范成大撰

金山錢熙祚錫之校

沿革

吳古揚州之域也初周大王三子太伯仲雍季歷季歷有聖子昌太王欲立季歷以及昌大伯仲雍乃奔荆蠻文身斷髮示不可用以避季歷荆蠻義之從而歸者千餘家號曰句吳立爲吳大伯自大伯作吳五世而吳王克商卽封其後爲二曰虞曰吳後十二世當周惠王二十二年晉獻公滅虞自武王元年至虞滅合四百七十八年又二世合七十一年至壽夢而吳益興始通中國壽夢卒子諸樊立譙十一年至壽夢而吳益興始通中國壽夢卒子諸樊立譙

云又名諸樊過

伐楚爲巢門人射傷卒弟餘祭

測界反

立餘祭卒弟

餘昧

莫葛反

立餘昧卒子僚立諸樊之子光弑僚自立是爲

闔廬破楚伐越越敗吳於檣李又敗之於姑蘇闔廬傷指而卒子夫差立三年乃伐越以報怨敗之於夫椒棲句踐於會稽句踐入臣於吳羣臣祖於浙江上句踐返國厚獻夫差夫差悅之乃賜書增之以封東至句甬西至檣李南至姑末北至平原縱橫八百餘里舉今四明三衢嘉興等地悉以與越十四年越遂入吳十八年又敗吳於笠澤二十一年遂圍吳二十三年滅吳欲以夫差居甬東夫差自剄越遂并吳而有其地是時魯哀公之二十二年也句踐卒傳六世至王無疆凡一百四十餘年楚威王伐越殺無疆盡取吳故地威王曾孫考烈王以吳封其國相春申君

黃歇使其子爲假君留吳秦始皇二十五年并天下以吳越地爲會稽郡治於吳漢因之領縣二十六項羽封英布爲九江王漢改九江曰淮南卽以封布十一年布誅立皇子長爲淮南王後封兄子濞爲吳王以上三國盡得揚州之地吳與會稽皆在封域中景帝四年濞誅乃復爲郡治於吳元鼎五年除東越因以其地并屬於此而立東部都尉後徙章安陽朔元年徙鄞又徙句章順帝永建四年陽羨周嘉一本作周喜上書以縣遠赴會難求得分置遂以浙江西爲吳郡領縣十三以東爲會稽郡會稽還治山陰按會稽典錄以爲是年歲在己巳劉府君上書也孫皓寶鼎元年分吳郡爲吳興郡晉吳郡領縣十一宋領縣十二元嘉

時以揚州浙江西屬司隸校尉以浙江東五郡立會州及
始平王子鸞初封新安王南徐州刺史又割吳郡屬之舊
經所謂大明七年廢屬南徐者是也八年屬揚州齊不改
陳爲吳州隋平陳改曰蘇州以姑蘇山爲名大業六年復
爲吳州領縣五唐武德四年復爲蘇州領縣四置都督督
蘇湖杭暨四州九年罷都督屬潤州正觀元年隸江南道
天寶元年改爲吳郡乾元元年復爲蘇州置浙江西道都
團練觀察使管蘇常潤杭湖睦六州後移使額於潤州而
蘇州屬焉乾寧之後屬錢氏吳越國黃巢之亂錢鏐聚兵
淮南楊行密據揚州鏐奔渡江據蘇州遂定浙西數州光
啟三年六合鎮將徐約攻陷蘇州龍紀元年鏐遣其弟鉉

討約破走之大順元年七月楊行密將李友陷蘇州九月
孫儒圍蘇州十一月陷之殺李友二年鏐復平蘇州詔以
鏐兼蘇杭等州觀察處置等使乾寧三年楊行密將臺濛
陷蘇州五年九月鏐討平之梁開平二年楊行密復圍蘇
州三年鏐復討平之唐同光二年昇蘇州爲中吳軍晉天
福五年割嘉興縣爲秀州本朝開寶八年改中吳軍爲平
江軍太平興國三年錢俶納土以上沿革以吳越春秋史記漢書晉書南史會稽典
錄十道四蕃志九國志吳越備史及舊圖經等參修政和三年以徽廟節鎮之所陞
蘇州爲平江府

分野

黃帝分星次斗十一度至婺女七度曰須女又曰星紀於辰

在丑謂之赤奮若於律爲黃鍾

斗建在子今吳越分野

費直分星次斗十度至女五度爲星紀於辰在丑吳越分野

屬揚州

蔡邕分星次斗六度至須女二度謂之星紀大雪冬至居之
吳越之分野

陳卓范蠡鬼谷張良諸葛亮譙周京房張衡分星次分壄斗
牽牛須女吳越揚州九江入斗一度廬江入斗六度豫章
入斗十度丹陽入斗十六度會稽入牛一度臨淮入牛四
度廣陵入牛八度泗水入女一度六安入女六度

唐一行所分星次分壄南斗牽牛星紀之次也丑初起斗九

度

餘千四十二
秒十二大

中斗二十四度

一千七百八半

終女四度其分野

自廬江九江負淮水之南盡臨淮廣陵至于東海又逾南
河得漢丹陽會稽豫章郡西濱彭蠡南涉越州盡蒼梧南
海古吳越及東南百越之國皆星紀分也南斗在雲漢下
流殷淮海之間爲吳分牽牛去南河浸遠故其分野自豫
章東達會稽南逾嶺徼爲越分島夷蠻貊之人聲教之所
不洎皆係于狗國

戶口稅租

舊經所記詳矣前漢領縣二十六故戶至二十二萬口至一
百三萬後漢領城十三戶止十六萬自後領縣浸減又多
兵亂戶口亦耗惟唐天寶元年戶止七萬口至六十三萬

皆有奇然長慶集以爲十萬戶此後來增衍也大唐國要圖云唐朝應管諸院每年兩浙場收錢六百六十五萬貫蘇州場一百五萬貫觀此一色足以推見唐時賦入之盛矣

本朝戶主二萬七千八百八十九元豐三年戶十九萬九千口三十七萬九千皆有奇號爲甚盛故其輸帛爲疋者八萬苗爲斛者三十四萬九千續爲兩者二萬五千免役爲緡者八萬五千皆有奇今攷孫覲普明寺記載宣和間戶至四十三萬中更狄難掃蕩流離城中幾於十室九空中興爲輔郡涵養生息六十年矣淳熙十一年戶十七萬三千四十二口二十九萬八千四百有五苗三十四萬三

千二百五十六石六斗九升六合四勺五抄夏稅折帛錢
四十三萬九千三百五十六貫四百五十八文上供諸色
錢共一百二十三萬一千二百八貫九百文

土貢

唐之士貢攷之唐書所貢絲葛絲綿八蠶絲緋綾布白角簞
草席鞵大小香杭柑橘藕鮐皮鮆腊鴨胞肚魚魚子白石
脂蛇粟大典又有紅綸巾蛇牀子圖經及九域志圖敘唐
貢絲綿絲布八蠶絲朱綾等外又有絲布菱米柑橘藕燈
心席燈心草鞋子口味三十七鮐魚條鮆魚條魚春子焉
二魚條疑卽鮐皮鮆腊春子疑卽魚子也大唐國要圖又
載蘇州貢絲絹綾絹烏眼綾衫段羅紵布折阜布柑子橘

子菱角三書所載不同如此

本朝土貢攷之九域圖所貢坐倚席白塏柑橘鹹酸果子海

味鯊魚肚糟薑元豐土貢錄載戶部薰橘一萬五千顆

治平

四年

生絲鞋

皇祐

花蓆二十合

熙寧三年

又云進奏院狀稱

見今逐年進奉土產柑橘糟薑鹹酸果子又云今別貢葛二十疋白石脂蛇牀子各十斤蓆二十領以上本朝故事今惟遇聖節貢銀五百兩絹五百疋葛布二十疋

吳郡志卷二

風俗

吳之士風習俗隋志詳矣江南之俗火耕水耨食魚與稻以
漁獵爲業雖無蓄積之資然而亦無饑餒其俗信鬼神好
淫祀父子或異居大抵然也其人並習戰號爲天下精兵
俗以五月五日爲鬪力之戲各料彊弱相敵事類講武宣
城毗陵吳郡會稽餘杭東陽其俗皆同然數郡川澤沃衍
有海陸之饒珍異所聚故商賈並湊其人君子尚禮庸庶
淳龐故風俗澄清而道教隆洽亦其風氣所尚也隋志華誼
論去吳有發劒之節趙有挾色之客郡國志云吳俗好用
劒輕死又六朝時多鬪將戰士按諸說吳俗蓋古如此本

朝文教漸摩之久如五月鬪力之戲亦不復有惟所謂尚
禮敦履澄清隆洽之說則自若豈詩所謂美教化移風俗
者與

吳趨行樂府解題云古樂府吳趨者行經趨市也文選注云
趨步也此曲吳人歌其土風也吳王闔閭起昌門象闔闔
舊說吳人歌其地也晉陸機吳趨行曰楚妃且勿歎齊娥
且莫謳四坐並清聽聽我歌吳趨吳趨自有始請從閭門
起閭門何峩峩飛閣跨通波重櫓承游極回軒啓曲阿藹
藹慶雲被泠泠鮮風過山澤多藏育土風清且嘉泰伯導
仁風仲雍揚其波穆穆廷陵子灼灼光諸華王迹頽陽九
帝功興四遐大皇自富春矯手頓世羅邦彥應與運粲若

春林葩屬城咸有士吳邑最爲多八族未足侈四姓實名
家文德熙淳懿武功侔山河禮讓何濟濟流化自滂沱淑
美難窮紀商推爲此歌

樂府題解

吳音清樂也乃古之遺音唐初古曲漸缺管絃之曲多訛失
與吳音轉遠議者請求吳人使之傳習

唐會要

正觀中有趙

師者善琴獨步嘗云吳聲清婉若長江廣流綿綿徐游國
士之風今樂府有吳音子世俗之樂耳

白紵舞案舞辭有巾袍之言紵本吳地所出宜是吳舞也晉
俳歌曰皎皎白緒節節爲雙吳音呼緒 紵疑白緒卽白

紵也

古今樂錄

吳歆吳人歌也

拂舞白符舞白鳧鳩舞按舞志曰江左初有拂舞吳舞檢其
歌非吳辭也又楊泓拂舞序曰自到江南見白符舞或言
白鳧鳩舞云有此來數十年察其辭旨乃是吳人患孫皓
虐政思屬晉也

吳農器甚備以其地平夷盡爲田也唐陸龜蒙有耒耜經今
具載之曰農之言也民之習通謂之犁冶金而爲之者曰
犁鑣曰犁壁斲木而爲之者曰犁底曰壓鑣曰策額曰犁
箭曰犁轅曰犁梢曰犁評去聲曰犁建曰犁槃木金凡十有
一事耕之土曰墾墾猶塊也起其墾者鑣也覆其墾者壁
也草之生必布于墾不覆之則無以絕其本根故鑣引而
居下壁偃而居上鑣表上利壁形下圓負鑣者曰底底初

實于鑱中工謂之鼈肉底之次曰壓鑱背有二孔係于壓
鑱之兩旁鑱之次曰策頷言其可以扞其壁也皆馳然相
戴自策頷達于犁底縱而貫之曰箭前如程而膠者曰轅
後如柄而喬者曰梢轅有越加箭可弛張焉轅之上又有
如槽形亦如箭焉刻爲級前高而後庠所故曰箭以其淺
深類可否故曰評評之上曲而衡之者曰建建捷也所以
柅其轅與評無是則二物躍而出箭不能止橫於轅之前
末曰槃言可轉也左右繫以櫟乎軛也轅之後末曰梢中
在手所以執耕者也轅車之胸梢取舟之尾止乎此乎鑱
長一尺四寸廣六寸壁廣長皆尺微橢敕果切底長四尺廣
四寸評底過壓鑱二尺策減壓鑱四寸廣狹與底同箭高

三尺評尺有三寸槃增評尺七焉建惟稱絕轅修九尺梢

得其半轅至梢中間掩四尺犁之終始丈有二耕而後有

爬去聲渠疎之義也散塏去芟者焉爬而有礮呼格礮宅焉有

礮礮焉自爬至礮礮皆有齒礮礮觚稜而已咸以木爲之

堅而重者良江東之田器盡於是

牛欄亦名牛宮吳地下涇冬寒卽牛入欄唐人謂之牛宮陸

龜蒙有祝牛宮詞其序曰冬十月耕牛違寒築宮納而造

之建之前日老農請乞靈于土官以從鄉教予勉之而爲

辭四牯三牯中一去乳天霜降寒納此室處老農物物度

地不畝東西幾何七舉其武南北幾何六二加五偶楹當

間載尺入土太歲在亥餘不足數上締蓬茅下遠官府耕

耨何時飲食得所或寢或臥免風免雨宜爾子孫實我倉庾

具吳中水國夫魚之具尤多陸龜蒙皮日休嘗爲魚具詩

序其事大凡結繩持網者總謂之網罟之流曰罟曰罾曰

翼

側交反

圓而縱捨曰罩挾而升降曰罔女減切縉而竿者摠

謂之筌筌之流曰筒曰車橫川曰梁承虛曰筍編而沈之

曰簞

音卑

矛而卓之曰楫

音冊

也

棘而中之曰叉鏃而綸之曰

射扣而駛之曰棖

以薄板置瓦器上擊之以驅魚

置而守之曰神

鯉魚

而守之曰神

鯉魚

而守之曰神

鯉魚

歲蛟龍輒率而飛去年置一

神守之則不能去矣神龜也

列竹於海澨曰漚

吳之漚

漚是也

錯

薪於水中曰蓐

音蓐

所載之舟曰舩

舩所貯之器曰筇簪其

他或術以招之或藥而盡之皆出於詩書雜傳及今之聞

見可考而驗不誣又擇其任詠者作十五題其所謂十五
題者曰網曰罩曰罟曰釣筒曰釣車曰魚梁曰又魚曰射
魚曰鳴根曰漚曰繆曰種魚曰藥魚曰舢舨曰笱松陵集

魚斗者吳俗以斗數魚今以二斤半爲一斗買賣者多論斗
自唐至今如此皮日休釣侶詩云趁眠無事避風濤斗

霜鱗換濁醪莫怪兒童呼不得盡行烟雨漉車螯

吳中賣魚論斗

吳下全盛時衣冠所聚士風篤厚尊事耆老來爲守者多前
輩名人亦能因其習俗以成美意舊通衢皆立表揭爲坊
名凡士大夫名德在人者所居往往以名坊曲元參政絳
所居名衮繡坊富祕監嚴所居名德壽坊蔣密學堂家產
芝草名芝草坊范侍御師道所居名牙冠坊盧龍圖秉奉

其親八十餘名德慶坊朱光祿所居有園池號樂圃名樂圃坊臨水亭館以待賓客舟航者亦或因其人相近爲名德壽亭以德壽富氏也旌隱亭以靈芝蔣氏也此風惟吳

邦見之

石林避暑錄

晉周玘以憂憤謂子颺曰害我者諸僮丁也吳人謂中州人曰僮云陸玩食酪得疾與王導牋云僕雖吳人幾作僮鬼蓋輕易之詞

吳中自昔號繁盛四郊無曠土隨高下悉爲田人無貴賤往往皆有常產以故俗多奢少儉競節物好遊遨歲首卽會於佛寺謂歲馘士女闐咽殆無行路親友有經歲不相面者多於此時相見或慶或弔紛然議姻親覘婿婦亦多決

於此時上元影燈巧麗它郡莫及有萬眼羅及琉璃毬者
尤妙天下以糖糰春蟹爲節食爆糯穀於釜中名學婁亦
曰米花每人自爆以卜一歲之休咎春時用六柱船紅幕
青蓋載簫鼓以遊虎邱靈巖爲最盛處寒食則拜掃墳墓
競渡亦用清明寒食四月八日浮屠浴佛徧走閭里重午
以角黍水糰絲索艾花畫扇相餉夏至復作角黍以祭以
束糗之草繫手足而祝之名健糗云令人健壯又以李核
爲囊帶之云療飢七夕有乞巧會令兒女輩悉預謂之小
兒節重九以菊花茱萸嘗新酒食栗糗花糕十月朔再謁
墓且不賀朔是日開爐不問寒燠皆熾炭俗重冬至而略
歲節臘日併力春一歲糧藏之土瓦瓮中經歲不蛀壞謂

之冬舂米十六日婦女祭廁姑男子不得至二十四日祭
竈女子不得預二十五日食赤豆粥云辟瘟舉家大小無
不及下至婢僕猫犬皆有之家人有出外者亦貯其分名
曰口數粥是夕爆竹及攤田間燃高炬名照田蠶歲節祭
饗用除夜祭畢則復爆竹焚蒼术及辟瘟丹家人酌酒名
分歲食物有膠牙飭守歲盤夜分祭瘟神易門神桃符之
屬夜向明則持杖擊灰積有祝詞謂之打灰堆蓋彭蠡廟
中如願故事吳中獨傳此一歲風俗之大略也

吳語謂來爲釐本於陸德明貽我來牟弃甲復來皆音釐德
明吳人豈遂以鄉音釋注或自古本有釐音耶吳謂罷必
綴一休字曰罷休史記吳王語孫武曰將軍罷休蓋亦古

有此語

慶歷九老會都官員外郎徐祐與少卿葉參俱以耆德告老而歸約爲九老會晏元獻公杜正獻公皆寄詩贊之晏詩首句云買得梧宮數畝秋便追黃綺作朋儔杜詩卒章云如何九老人猶少應許東歸伴醉吟時會者纔五人故杜詩云爾

九老會後更名耆英又名真率元豐間章岵守郡與郡之長老遊從各飲酒賦詩時米黻禮部以杭州從事罷經由爲作敘敘諸老之德甚詳十老謂大中大夫致仕上護軍濮陽縣開國子廬革仲新年八十二奉議郎致仕騎都尉賜緋魚袋黃挺公操年八十二正議大夫充集賢殿修撰致

仕上柱國廣平郡開國侯程師孟公闢年七十七朝散大
夫致仕上輕車都尉鄭方平道卿年七十三朝議大夫致
仕護軍清豐縣開國子賜紫金魚袋閭邱孝終公顯年七
十三中散大夫知蘇州軍州事河間縣開國伯護軍賜紫
金魚袋章岵伯望年七十三朝請大夫主管建州武夷山
冲佑觀賜紫金魚袋徐九思公謹年七十三朝議大夫致
仕上柱國彭城縣開國子賜紫金魚袋徐師閔聖徒年七
十二承議郎致仕騎都尉賜緋魚袋崇大年靜之年七十
一龍圖閣直學士正議大夫提舉杭州洞霄宮清河郡開
國侯張詵樞言年七十十人合七百四十六歲十老各有
詩米敬序之

中散大夫河間公清德傑氣惟時老成高誼
勁節縉紳所仰靜鎮吳國四周星紀威孚惠

治訟庭晨虛迺聞郡齋會九俊老惟內閣河公神宇軒
拔德章昭融名威荒夷勲書冊府正議大夫廣平公秀實
孤映清標邁遠鬱建功利煥于汗青太中大夫僕陽公冲
襟爽澈淑質端靖積厚施衍父子顯榮朝議大夫清豐公
朝議大夫彭城公朝議大夫徐公朝散大夫鄭公並道韻
虛曠內德淳耀或中臺耆彥或四方膚使出處有裕終始
一德愷悌利愛布在世間承議郎崇君奉議郎黃君素行
潔修里閭標準早解簪紱仕路式瞻咸頌碩德天錫難
老貌若遼鶴言爲龜鑑於時羽觴屢酬雅章迭作敘懷威
遇樂時休明顧盼之問穆如清微薰如大和夫學本美身
仕欲行志名節旣立榮利後之若諸公積儲淵深未極經
緯而不苟於得進退從容于祀可垂後生仰止以襄陽米
飯倦游四海多出賓僚刻繪旣傳屬爲序引嗚呼
樂道人善君子有之顧微何堪忝於承命謹序

淳祐己酉月正人日郡守鄭霖會三學同舍序拜于天慶齋

堂會者四十二人天台鄭霖景說

參持志論存心長服膺學諭

吳門顏

岩世光

性節

應天滕嘉景初

養正

天台周公明元德

養正

吳門孔

煜明仲

觀化學諭

吳門盛文韶景聲

率履

吳門詹次驤平叟

持吳志

門滕照德明

正養

會稽楊珍庭玉

九

三衢滕英傑德秀

正養

婺

女吳邃困仲

誠意

吳門張經德常

服膺習是

會稽李士特

奇父

行果

吳門錢振祖季玉

言第

嘉禾趙與理子正

過宗

懷德

立愛

三山趙綰夫景揚

宗學懷德學錄

吳門趙震亨子東

果行過

吳門

朱杲晦叔

本務

興化陳壽翁仁父

篤信過果行學論

三山陳夢圓宗

震

本務

嚴陵諸葛克念師聖

理循

三山陳桂巖肖

持志

三山林應

炎光遠

是習

吳門陳伯章煥文

意誠

吳門呂直之道夫

持志

三山

陳龍炎剛伯

意誠

毗陵李熾子明

心存

吳門范爽邦景哲

守約

三

山鄭宏洪甫

率履

吳門干天麟仁仲

是習

合陽侯燿季立

持志

通

川高仁立仲立

禮立

吳門陳由之子是

意誠

吳門趙時璫德玉

明賢過懷德

通川高仁洽君澤

立禮

吳門張應高仰之

貫通

天台范

應時蘇甫

習

金華范士表仲端

服

南劔陳洧有之

率

臨安

章昌朝文叔

德經

三山陳鈺伯堅

正義

通川陸應霆伯聲

服

序

曰

淳祐九年歲在己酉天基錫宴之後二日三學同舍序拜于吳門天慶觀禮成讌于郡之春雨堂有執爵而祝

者三始酌曰侯自製錦而歷符節加惠此邦尚矣願守五年之信終始如一毋廢甘棠又酌曰仕而行義敬共厥職願毋愧羔羊又酌曰學優則仕時當其可願無負口豐芭於是合席皆作而謝曰凡我同盟有味斯言是集也序以齒交以禮會以文隱然鄉飲之遺風依然齋廬之舊習歡然相愛而又有規焉古之人飲食必祝歌詩以見志其庶幾乎○又春雨堂卽事詩曰十年隨牒訪三高不覺星星上鬢毛尚憶壺鹽形夜夢聊因椒柏薦春醪文明再會知何日臭味相投屬我曹總是虞庠舊培植知君當不愧夔臯

吳郡志卷三

城郭

太伯城周三里二百步外郭三百餘里在西北隅名曰故吳
又曰吳城在今梅里平墟人民皆田其中

闔閭城吳王闔閭自梅里徙都卽今郡城始闔閭舉伍子胥
於耕野以爲行人以客禮事之與謀國政問子胥曰寡人
欲彊國霸王何由而事濟子胥對曰臣聞治國之道安君
理民爲上闔閭曰其術奈何子胥曰凡欲安君治民興霸
成王從近制遠必先立城郭設守備實倉廩治兵庫斯則
其術也闔閭曰善夫築城郭立倉庫因地制宜其有天氣
之數以威鄰國者乎子胥曰有闔閭曰寡人委計於子乃

使相土嘗水象天法地築大城周迴四十七里陸門八以象天之八風水門八以法地之八卦築小城周十里門之名皆伍子胥所制東面婁匠二門西面閶胥二門南面盤蛇二門北面齊平二門唐時八門悉啓劉夢得詩云二八城門開道路許渾詩云共醉八門回畫舸今惟啓五門八門吳地記所紀而不載葑門續經載葑門而謂平門一名巫門與赤門二門皆不在八門之數蓋考之於今者如此方故吳時東門不開欲以絕越也梁吳均吳城賦曰古樹荒煙幾百千年云是吳王所遷東有鑄劍殘水西有舞鶴故塵縈具區之廣澤宕姑蘇之遠山僕本蓄怒千悲億恨况復荊棘蕭森叢羅網蔓亭梧百尺皆歷地而生枝階筠

萬丈或至杪而無葉不見春花夏薰唯聞秋蟬冬蝶水魅

晨定山鬼夜驚不知四海九州乃復有此吳城

杜牧吳城詩二月春

松江上來水晶波動碎樓臺吳王宮殿柳含翠蘇小宅房

花正開解舞細腰何處往能歌姹女逐誰回千秋萬古無

商息國作荒

原人作灰

閶門文選注吳王闔閭立閶門象天閭闔門吳越春秋曰城
立昌門者象天通閭闔風也南史及傳記中或書作昌門
蓋字之訛吳越春秋又曰昌門亦名破楚門吳伐楚自此
門出也孫堅母夢腸繞昌門俗傳昌門魯班所造又傳楚
封春申君於吳號云破楚改曰昌門亦非是小說或謂名
望齊門乃與齊門相犯非是陸機吳趨行云吳趨自有始
請從閶門起文選注引吳地記昌門者闔閭所作名曰閶

闔門高樓閣道按陸機所賦此門在晉時樓閣之盛如此

本朝承平時門上亦有樓三間甚宏做蘇舜欽嘗題詩於

上今廢張繼詩耕大占募逐樓船春草青青萬頃田試上

樹遙知吳苑園淒涼千古事日暮倚閭門自居易闔門四

壁鬱蒼蒼始覺州雄士俗強十萬人家供課稅五千子弟

管吹家門外泊舟船雲埋虎寺山藏色月羅娃宮水放

光曾賞錢塘嫌茂苑今求未敢苦誇張蘇舜欽年華冉冉

崔人土雲物蕭蕭又變秋家在鳳皇山下住江山何事苦

留相

婁門秦婁縣所置又謂之嚠今謂之崑山崑山縣東北三里

許有村落名婁縣蓋古縣治所寓也

齊門齊景公與吳戰不勝以少女嫁吳太子終纍所謂涕泣而女於吳者終纍闔閭長子夫差兄也早亡齊女思家吳

王於此作九層飛閣令女登以望齊故名

陸廣微吳地記

胥門伍子胥宅在其旁吳地記云石碑見在今亡此門出太

湖道也今水陸二門皆塞而新姑蘇臺館乃據其上

皮日休詩

青翰盧徐夏恩清愁煙漠漠荷花平水欲把田田葉盡

衰當時羅酒請陸龜蒙細聚輕擗下白蘋故城花柳綠陰

新登無今日地名土試問南塘著履人

盤門吳地記云吳嘗名蟠門刻木作蟠龍以鎮此又云水陸

縈回徘徊屈曲故謂之盤

補注

門有樓寶慶三年秋大風雨

樓門俱壞紹定二年冬郡守李壽朋新作之規制視舊有

加蛇門在巳方故云又云越在巳地吳作木蛇北向示越屬吳

也吳地記謂有陸無水卽與陸門八之說相近然今巳位

正是漕河通過安得無水但門已廢不可攷爾

匠門又曰干將門續經止曰將門吳王使干將鑄劔於此故曰將門今謂之匠音之訛此門本出海道通大海沿松江下滬瀆今廢

葑門續經曰當作封門取封禺之山以爲名故屬吳郡今屬吳興今但曰葑門葑門陸路嘗塞范文正公開之今俗或訛呼富門

赤門平門續經謂不在八門之數平門一名巫門巫咸所葬巫平字畫相近今猶有赤門灣近葑門吳地記又云又有葑門赤門栗門魴鯨門葑赤已見上魴鯨之類皆無所據開胥蛇門議胡舜申所作其說甚詳今具載之舜申乃舜陟

之弟也通風土陰陽之術世所傳江西地理新法出於舜
申紹興間自績溪徙居吳暇日以其術行四郭而相之以
爲蛇門不當塞作吳門忠告一篇曰吳城以乾亥山爲主
陽山是也山在城西北屹然獨高爲衆山祖傑立三十里
之外其餘岡阜纍纍如羣馬南馳皆其支隴城居隴前平
夷如掌所謂勢來形止全氣之地也如祗自城中觀之則
城中之地亦唯西北最高是乾亥無疑乾爲天亥則紫微
帝座所次是謂貴龍此城旣主是山法當用金局乾亥於
大五行屬金故也山如此水則當與山相應此邦水勢自
東南貪狼西南及正西武曲以至西北巨門等位來其來
皆聚於太湖由正北廉貞及正東東北祿存而去以入于

江而歸之海其來去無一不合金局之法故自古常爲大郡國今爲行都藩輔而吳中人物繁夥冠蓋崢嶸所以常甲於東南今觀水之流派常自閶盤二門入卽西南西北水也由葑婁齊三門出卽正東正北東北水也其於來去之法固合然所以導迎善祥氣者尚有缺然蓋胥塘自正西帝旺來是謂武曲之水本由胥門入運河自吳江東南長生來是謂貪狼之水本由蛇門入頃歲乃塞胥蛇二門而生旺之水遂不得朝鄉城中此其爲害明陰陽風水者常嘆息於斯胥塘之水尚由閶盤二門委曲而入城東南長生之水乃環城而東徑由葑門之外以出於城中了不相關此尤可歎惜故自頃以來城市蕭條人物衰歇富室

無幾且無三世能保其居安士宦達者比承平時寢少至
建炎之禍一切掃地至舉城無區宅能存數百千年未之
有也按地里法生旺二水利害最切猶人身氣血榮衛今
塞絕之能安強乎明知者願圖回其事復開二門導水入
城以幸此邦可也胥門適當姑蘇新館勢不可動又武曲
但主財富而已蛇門之水爲貪狼主文筆官職之事於理
爲重復開之便政和修城於諸故門雖已塞然皆刻石於
右以識今石刻具存但襲府圖之誤以蛇門爲赤門爾蛇
門在城之巳方故以蛇名赤門以在城正南至陽之地其
義可考況蛇門直南正對吳江運河今舟船自南來非東
入葑門卽西入盤門皆迂遠十數里於水行非便昔吳王

闔廬始作城伍子胥實規畫之立陸門八以象八風水門
八以象八卦其後諸門開閉不常吳時欲以絕越遂不開
東南門卽蛇門也不知塞絕生氣故終爲越所滅茲亦明
効大驗至吳晉李唐時諸門未嘗不開故左太冲賦吳都
有通門二八水道陸衢之語劉夢得詩亦云二八城門開
道路故晉唐時吳下最爲雄盛今所啓門者五餘皆閉塞
而甚不可塞者唯蛇門究所以閉塞圖經之說爲其多途
艱於守衛幾禁噫抑末矣今清蹕暫駐錢塘吳尤當開東
南之門以伸朝拱之義焉吳城門不常啓閉舊矣昔年蓋
嘗於八門之外又開赤平二門而葑門陸衢蓋嘗塞矣范
文正公守郡始命闢之往來至今爲便誠能遠迹晉唐近

効文正復闢蛇門東南虛秀之氣疏導迅發儒道利亨文
物之盛非復今日吳下矣乾道甲申冬直祕閣沈度守郡
與舜申舊同寮知其說心善之明年春邦人以爲請度卽
命官吏行視其處將以十二月乙丑啓蛇門部置已定會
屬邑輒呼帶郭民戶悉具畚鍤期赴役號召隱然有異
意者以爲擾民度避謗乃止淳熙乙未春祕閣修撰韓彥
古起復爲守其秋邦人申前請彥古欣然從之卜以九月
十二日庚寅差役八月彥古罷是時舜申年八十五慨然
惋惜謂天時人事難合如此復爲後序告來者詞贅不錄

吳郡志卷四

學校

府學在南園之隅景祐元年范仲淹守鄉郡二年奏請立學
得南園之巽隅以定其址元祐四年純禮持節過家又請
于朝復得南園隙地以廣其垣卒父志也紹興十一年梁
汝嘉建大成殿十五年王喚繪兩廡像創謹堂闢齋舍規
模宏敞視昔有加乾道九年邱密造直廬淳熙二年韓彥
古創采芹印高二亭十六年趙彥操建御書閣五賢堂在
講堂左五賢謂陸贄范仲淹范純仁胡瑗朱長文也

〔朱長文記〕兩儀定位學校興矣五教旣敷學校立矣禮義
不可一日忘故學校不可一日廢也昔唐虞三代之盛未
嘗不以建學嚴師爲先務內則王世子羣后卿大夫元士
之適子其入以齒外則塾黨鄉遂之間其教以時下至於

四方萬國之遠皆命之爲庠序其法詳矣故始於直寬剛簡而防其失次以歌詩音律而致其和者此堯舜之興樂所以教也以智仁聖義忠和爲之德孝友睦姻任恤爲之行禮樂射御書數爲之藝此周之大司徒鄉大夫所以教也上之所以教於下下之所以應於上若置郵而傳命也若決江河莫之能禦也書美萬邦黎獻可以共爲帝者之臣詩稱成人有德小子猶有所造其材之可用如此蓋當是時風化行習俗美人人有士君子之器雖畎畝之賤山林之幽亦爲仁義之所漸摩禮樂之所陶冶咸入于善置兔而不忘敬敦葦而不忍踐豈有暴亂萌于心姦宄害于事者哉此建學之效也王道衰禮義廢獨一魯侯能修泮宮因馭之獻猶不離此邦人頌焉戰國之際孟軻猶歷說時君謹庠序之教申孝弟之義終闊而不用習大亂迄於秦棄儒任法民不知學而疾視其君蠶起而墟秦矣漢方休息元元未遑先王之教世宗奕奕首善于京其臣有若董仲舒者爲大夫文翁者爲守吏皆尚儒術迺置博士弟子之員而立學校官於郡國其課士必以經藝蓋士不素養則德難遽考使因學以知經因經以會道庶乎有成矣東京內盛三雍之儀不及於外而鄭興賈逵馬融鄭康成之徒繼爲人師以經相授囊括古典六學浸明是以時政雖亂於上而義士交起於下抗節濡足用收陵夷漢賴以不亡者百餘年魏分晉弱事不足道唐之文物盛矣而

尙賦以取人世傳經術以文辭相夸夫文所以宣志也觀其文則志可瘦哉故元臣碩老多由辭科以出神宋受命遏亂興治乘輿常幸國庠親臨講席是時勲臣宿將並列藩鎮庠序雖未興而鴻儒碩生聞風以起有若戚堅素在睢水种明逸在終南皆聚徒講授髦俊歸之其後陪京方面之守臣稍請興學自景祐中范文正公作學於吳又初於潤滕子京建於湖慶歷之盛文正公參預機政而石守道孫明復首居太學是時仁宗開天章閣召輔臣八人問以治要文正公復以學校爲對於是詔天下皆立學神宗之時立三舍法置方郡教官皆試可而後授今上嗣位申命近臣薦堪內外學官者方聖朝承平之久而長育之勤雖溷海裔夷之邦孰未垂髫之子孰不抱籍綴辭以干榮祿衰然而赴詔者不知其幾萬數蓋自昔未有盛於今也凡命教之法以經術觀其學以詞賦觀其文以論策觀其智所取兼於漢唐而德行道藝之士參出乎其中矣然欲合二帝三代之法使人人有士君子之器在吾君相之所潤色也始姑蘇郡城之東南有夫子廟所處隘陋方文正公以天章閣待制守是邦欲遷之高顯相地之勝莫如南園南園者錢氏之所作也高木清流交蔭環醞乃割其異隅以建學廣殿在左公堂在右前有泮池旁有齋室是時學者才逾二十人或言其太廣文正曰吾恐異日以爲小也於是召安定先生首當師席英才雜遝自遠而至厥後

登科者逾百數多致顯近繇景祐訖今五十餘載學者倍
徙於當時而居不加闢也長文適奉命掌學周視黌舍傾
陟徧迫寒薄暑愀諸生病之來者無所處乃與同僚議請
南園隙地以廣齋廬屢稔於郡守部刺史病財用之不給
會文正之子兵部侍郎公純禮以厚德遠業見器朝廷出
自奉常制置江淮六路漕事持使者節過鄉上冢廼以學
舍之微白公公旣卽學拜文正公遺像延見諸生感慨陳
迹卽奏言蘇潤之學皆先臣所建後之久不葺而齋室不
庇風雨講習無所願給錢修廣而今太守諫議王公在潤
先以潤學爲請有詔各以度牒十紙充其費時元祐四年
五月也前守戶部劉公程選官治役度用賦工會王公自
潤易蘇下車三日臨視興作命下裁築填圩立基如講之
素益以闢賦之材助以亡命之卒完舊砌新累工逾萬葺
歲而告成不以一分取於民公堂擴如也廊廡翼如也齋
室凡二十二而始作者十爲屋總百南五十楹而初建者
三之一立文正公安定先生祠宇遷校試廳於公堂之陰
榜曰傳道庖厨澡室莫不嚴潔竊然而深曠然而明其處
也寬其容也衆南楹引受日北牖延清風咸適其宜矣凡
學田之佃於人而隱沒者爲之括而實之屋之餽於市而
已壞者爲之新而復之養士之資由此不匱皆太守所命
也凡儒者早暮孜孜從事於典籍苟居處之不佚饌糧之
不豐而責其勤難矣故嚴其宮足其餽所以教也且吳爲

東南都會自泰伯三遜天下延陵脫屣千乘言偃以學稱
嚴助以文著朱張顧陸世多顯者此誠禮義之區儒雅之
藪也今夫興學以教者豈徒貴其中程課躡科等哉必也
爲文足以貫道爲經足以通理立於朝廷則謀王體贊國
論仕於郡縣則宣惠澤興事功其餘風所扇猶將使人老
老而幼幼夫而婦婦室有忠信俗有廉潔然後知新學
之作豈專以棟宇爲哉君子爲兵部公善述其先志可謂
之孝正諫公以道立朝忠精不回其治異朞月吏民咸其德而
正諫公以道立朝忠精不回其治異朞月吏民咸其德而
安其政晝坐郡閭事至卽決已而與賓客雍容笑語沛然
有餘裕方學之成吳人莫不欣悅鼓舞望車馬之來而樂
芹藻之采也見命作記確辭莫獲輒系之聲詩刻之隆碣
以告于後世云詩曰惟帝光宅錫民保極曷以臻茲惟教
之積降漢迄唐以經以文元臣碩老世偉其人天佑神未
七聖繼德右儒尚文經緯九域肇開雍庠周設泮序興賢
舉能歲幾千數維吳有學文正是興師明友諒俊傑紹登
歷載五紀烝然髦士將圮其隘士罔能止翼翼膚使繼述
其先建言于朝授牒易泉邦牧承命以新以廣匪憚厥勤
資我教養高堂邃廡環闥羣齋潭潭其深濟濟其來孰居
是堂勿尸厥職亶爾誠心傳道解或凡處是齋勿嬉勿息
道德淵源辭章潤色拱把之木長而參雲涓勺之水滌而
流坤匪學之設惟材之成是明是翼永贊丕平鄭仲熊重

修大成殿記畧云郡邑置夫子廟於學以歲時釋奠蓋自
唐正觀以來未之或改我宋有天下因其制而損益之姑
蘇當浙右要區規撫尤大更建炎戎馬蕩然無遺雖修學
宮於荆榛瓦礫之餘獨殿宇未遑議也每春秋展禮於齋
廬已則置不問殆爲闕典今寶文閣直學士括蒼梁公來
牧之明年實紹興十有一禋也二月上丁修祀既畢乃惕
然自咎揖諸生告之曰天子不以汝嘉爲不肖俾再守茲
土顧治民事神皆守之職惟是夫子之祀教化所基尤宜
嚴且謹而拜跪薦祭之地庫陋乃爾其何以揭虔妥靈汝
嘉也不敢避其責曩嘗去此彌年若有所負尙安得以罷
輒自恕復累後人乎他日或克就緒願與諸君落之於是
謀之僚吏搜故府得遺材逾千枚取贏貲以給其費鳩工
庀役各舉其任歲月訖工民不與知像設禮器
百用具修至於堂室廊序門牖垣牆皆一新之

六經閣舊有之吳學始於范文正公後更八政始成而此閣
成於富嚴郎中先是張伯玉嘗以郡從事主學後帥浙東
閣始成世傳邦人謁記於伯玉伯玉令參佐擬撰皆不如
意一日對衆援筆書首句云六經閣子史在焉不書尊經

也坐皆歎服

張伯玉六經閣記云六經閣諸子百家皆在焉不書尊經也吳郡州學始由高平范公經

構之至今尚書富郎中十年更入政學始大成而今年六
經閣又建先時書籍草創未暇理緝厨之後廡澤地汙晦
日滋散脫觀者惻然非古人藏象魏拜六經之意至是富
公始與吳邑長洲二大夫以學本之餘錢就之市材直公
堂之南臨泮池構屋起夏六月乙酉至秋八月甲申凡
旬有七浹計庸千有二百作楹十有六棟三架雷八桷三
百八十有有四二戶六牖梯衡棗稅巧塤陶甃稱是祈於久
故爽而不庫酌於道故文而不華經南嚮史西嚮子集東
嚮標之以油素揭之以油黃澤然區處如蛟龍之鱗麗如
日月之在紀不可得而亂矣則天地之極致皇王之高道
生人之紀律舉在是矣古者聖人之設教也知函夏之至
廣生齒之至衆不可以頤解耳授故教之有方導之有原
乃本庠序之風師儒之說始於邦達於鄉至於室莫不有
學廡之以文物聳之以聲明先用警策其耳目然後清發
其靈腑故其習之也易其得之也深其教不肅而成不煩
而治歐元元之人善域優而柔之俾自得之萬世之後尊
王四代法者無它焉教化之本未馴漸也然則觀是閣
者知六經之在則知有聖人之道知有聖人之道則知有
朝廷之化知有朝廷之化則嚮方之心日慙一日禮義之
言流於外絃誦之聲格於內其爲惡也無所從其爲善也

自所歸雖不欲從善遠罪納諸大和不可召康公之詩曰
豈弟君子來游來歌子思子之說云布在方冊人存則政
舉凡自君子繇斯道覺斯民暢皇極序彝倫者捨此而安
適得無盡心焉諸儒謂伯玉嘗從事此州游學滋久宜刊
樂石庶幾
永永無忽

御書閣淳熙十四年郡守祕閣修撰趙彥操卽六經閣舊址
爲之以奉高宗皇帝所賜御書石刻六經先是累政欲作
弗果彥操始克立遂爲郡庠壯觀焉

洪邁記若稽古高宗皇帝實天生德旣以

聰明聖武敷濟多難垂中興億年之基洎保大定功投戈
息馬於世紛魚妹泊乎無一略玩唯翰墨相域天縱神與
特致志願心不舍食息淵妙沈著顧韋誕鍾繇所擅正書
中取威定霸高處視古無上帝中第一殆臨麼不足言義
獻諸庾固已望洋斂避別唐歐虞褚薛輩直可臺輿命也
詩書易春秋孝經論語孟軻氏凡幾書書凡幾帙帙凡幾
字一一肆筆而成翥鳳翔鸞震盪輝赫端正嚴重肅如神
明當是時每終一經輒詔玉冊官摹刻編以石本修錫方
夏光天之內蓋郡戴其書昔人謂萬世之下一遇大聖而
知其解者是爲旦莫之遇況乎親見帝王以爲之師恩斯

勤斯土宜如何報也受奉當在頰宮蘇爲吳盛府故有六
經閣燬於兵紹興中守臣寶文閣學士王喚始改建學室
宇宏備夸雄它邦獨未克立而皮置石經於大成殿仍
儉就寡瓜華薊火之敬弗答弗涓揆於祇瞻殊甚不稱寥
寥向四紀郡博士領諸生數有請二千石亦數留意然畫
不堅定會其凡輒中止更數十政訖莫之能爲淳熙十四
年祕閣修撰趙彥操至平易中和敏絜莅業用善教得民
蘇比比多事且去天咫尺南北問塗者銜舟接軸冗叢厥
身居東道主第知承迎過客趣了亭傳爲先務樸藹馬上
戴星而入民瘼不暇問尚安以教化勸功爲哉彥操纔旬
月久非能滋民使多浚財使豐辟土使廣而千里一旦廓
廓如仙晨道院於是以一閣之任自子卽舊址度爲三楹
兩翼三其檐爲高六十尺爲廣七十有五尺材木以壯買
瓦石以願市工以募來發公帑贏儲千萬給費相以食錢
二十之一毫釐之須於我乎取慮卜於素五縣乃不知去
年秋七月壬戌命日今年春二月丁卯成一區之宮若飛
從天外行人駭觀凝立如植彥操寫其製以告當塗守邁
使識本末臣恭惟西廂清穆敞開之處至尊壽皇聖帝奉
先追孝方勒密煥章建宮列職燕迪宸奎之昭回上模紫
清一時臣子宜有以効尺寸彥操羽儀宗支嘗典正京邑
參侍從茲息園輔藩首能擴尊君親上然後興學之誼鳩
此巨役章天顯休僉謂當刊表樂石以詩不朽其詞曰故

吳所都上直斗牛今爲畿輔氣壓百州沈沈學宮鼎以傑閣爛其天光照我海岳倬哉高皇肆筆成書石經百卷方國是儲岩堯干雲翬若有造誰其尸之臣曰彥操洞庭之山具區五湖龍螭萬數右翼左趨惟爾有神實主張是時節來朝敬干萬禋

補注

吳學久不修寶慶三年秋七月大風雨殿閣堂館直

舍門廡齋亭皆摧圯欲壓紹定二年以復田得租遂新之始於憲守林介成於郡侯李壽朋吳潛作修學記陳

耆卿作復田記併附於後

修學記潛同里汪君泰亭教授吳學學有田爲豪右隱占

久君條具始末聞于守相聞于部刺史轉聞于相國迄歸田且得所負積賦爲錢三百五十萬有奇君曰有田矣不患無以養也有養矣不可無以安也顧瞻學官日頽月圯遂捐錢有事改作憲守林公介佐以他錢五十萬後來者刑獄使者王公與權常平使者王公棫郡太守李公壽朋皆相眠繼金粟財益衍用不匱仆興疆立朽革腐新悉就條理舊爲屋七百五十楹一一皆新美矣若耆宿若宗胄若業武遊學亦各有次獨童而習者

教毓未備迺別敝一齋曰小學口哉工於紹定戊子冬
十一月粵己丑秋七月既功於是吳學益興然甲東南
矣夫物囿於數者有成必有毀天地日月宇宙江山不
能逃焉而所以扶持於不壞不滅者人也彼大者固已
如此矣況小乎故新而久必敝敝而久必壞壞而久必
泯學基堂於文正范公父子中更南渡歷紹興閱乾道
至淳熙涉賢守數人經時數十載始大備而其積累艱
難亦可喟息矣能及其敝而未壞壞而未泯疾起而扶
持舉斯加彼察乎天地日月宇宙江山所以不壞不滅
者斯豈不足以盡人道而宏教法哉諸生朝游而夕息
景行先喆睹文正容貌而企慕其爲人其未仕也必如
文正刻苦自厲以六經爲師文章論說一本仁義而後
可其既仕也必如文正有是非無利害與上官往復論
辨不以官職輕人性命而後可其仕而通顯也必如文
正至誠許國終始不渝天下聞風夷狄委命而後可誠
如是矣則不負今相國今部刺史守相今郡文學所以
幸惠爾學者庶幾潛言抑有述焉是歲九月望日宛陵
吳潛記復田記按吳郡圖刻建學助文正范公主學昉
安定胡先生先生學法傳天下未墜學宮在一州亦未
廢也而田有不守者蓋公斥勝地爲官又擇沃壤爲田
更建炎亡其籍而紹淳之右與版獨爛如也不幸漁於
豪民之手黠吏羽翼之株遠穴探漫弗省治故在常熟

縣爲田千六百九十畝而租之入者僅千晦焉蓋十有九年更幾部使者郡守不能直幾校官不得直而得直者汪君泰亨能直之者林公介章公良朋司馬公述也方林公之攝守也汪君力以告公力主之已而章公爲守又力主之旣主之直矣有憾者司馬公爲使繼直其事遇林公再攝守復深直其事遂得直蓋歸其冒沒六百二十晦又歸其間羨四百餘晦士類起舞矣迺並祠三公于學而請記于余余惟三代盛時無地無學而無家無田故學之宮不待興田不待給而所謂良民者卽其所謂秀士也其後士與民二矣給之田以助學蓋將使士之秀者專之而迺使民之無良者奪之其於義何居而不知此邦之田則文正所給之田也給以助學則安定所主之學也自景祐以來言哲輔者孰如文正言明師者孰如安定二賢光氣覆罩八表豈以一州親沐嘉澤親染餘誨而可廢隊之乎以十有九年之湮沒而還之一朝其還者時也所以還者人也此三公之所以有賜於學也人知三公之賜之深由其主之之力而不知汪君之請之力其賜彙不淺也雖併祠可也夫三公治文正之地而汪君司安定之席者也或主養或主教一也凡爾多士因其養而邇其所以養如見文正焉因其教而邇其所以教如見安定焉以是學古窮經砥礪厲行未達則治已達則治天下國家將使事業顯融名

聲輝焯後之人見其盛而推其所自曰吳學之士也不負教與養者也其豈非三公與汪君之意夫其豈非文

正安定之意夫紹定二年八月朔日天台陳耆卿記

貢院在西河西明澤橋北舊西比較酒務基乾道四年郡守

姚憲建范成大書額

縣學記

吳郡自古爲衣冠之藪中興以來應舉之士倍承平時後五縣皆興學然其盛衰則繫令之賢否紹興間程沂爲崑山令重修學張九成作記或謂九成託此以諷遂不入石集

中亦不載比訪得之附於後

梁肅崑山縣學記學之制與政損益故學舉則道舉政汙

則道汙崑吳東鄙之縣先是縣有文宣王廟廟堂之後有學室中年兵饑荐臻堂宇大壞方郡縣多故未遑繕完其後長民者或因而葺之以民尚未泰故講習之事設而不備大歷九年太原王綱以大理司直兼縣令既釋奠於廟

退而歎曰夫化民成俗以學爲本是而不崇何政之爲乃
論三老主吏整序民飾班事大啓堂于廟垣之右聚五經
于其間以邑人沈嗣宗躬履經學傳爲博士於是遐邇
徒或童或冠不召而至如歸市焉公聽治之暇則往敷大
猷以登之博考明得以翼之優而柔之使自求之揭而厲
之使自趨之故民見德而興行之於鄉黨洽於四境父篤
其子兄勉其弟有不破儒服而行莫不稱爲金印公主於
設教嚮其末不墜其本易其俗不失其宜也傳曰本立而
道生昔崔瑗有南陽文學志王仲宣有南陽文學志皆表儒
訓以著不朽遂其流爲醫學記碑家者知我邑經藝文
教之所以興是歲龍集乙卯公爲縣二兩年也大歷九年
月日梁肅興王禹偁崑山縣新修文宣王廟記夫聖人
之生必受天命有佐者天使之化民爲一時也三帝王
之謂乎無位天使之立教爲萬世也先師夫子之謂乎是
以窮於旅人終於陌土非不幸也向傳居而王之於行堯
舜之風則顏閔之科猶元凱之舉也兩觀之誅四凶之罪
也自然道至而我無爲化行而人不不知時之奇者必曰何
力之有後之美者必曰無得而稱也雖流爲典謨形乎簡
冊亦不過濬哲文明溫恭允塞而已豈復有祖述憲章之
道流於後代乎故曰生民以來未有如天子者也秉筆之
士安得輕議其德業歟吳之諸郡姑蘇稱其尊郡之屬邑
崑山出其右雜以漁鹽之利漑乎朝夕之池昔在皇唐是

爲名邑降及錢氏茲惟上腴距海之田民斯阜矣然而庠序或缺儒素弗興實倉廩而禮節未知旣富庶而教化不至爲邑之長得無咎乎縣大夫邊公世爲儒流時號甲族自起家之調歷宰邑之資所在播其能名儕類驚其久次大來之望固未易知皇上嗣位之明年淮海王如京師且獻圖籍尊王室也主上思泰遠人精擇循吏銅墨之任尤難其才始得公以宰吳吳民受賜降璽書以勞之旌善政也秩滿受代將選於天官會茲邑有令尹之乏者二千石命公以承乏且敘政績聞諸冕旒未幾有卽真之命免常調也公因民所利壽月而治以爲人者教之本儒者教之先苟非師嚴而道尊烏可移風而易俗哉先是文宣王廟但有基址盡爲蒹蕪廢而不修六十年矣公乃出俸金以營之同僚悅隨羣吏弗違乃庀工徒乃度材用一畝之宮圖蔓以出之數仞之牆樹土而揭之殿堂旣嚴門闕斯備麗以丹漆飾以巧塤制度合乎禮文力役當乎農隙乃像素王被華袞垂珠旒王者之制彰矣乃狀十哲冠章甫衣縫掖儒者之服備矣廟之興也旣如彼像之設也又如此粵上丁之晨行釋奠之禮所以列豆饔陳簠簋潔牲牢具罍洗鬯幣有數尸祝有辭八音作而人和三獻終而神悅禮無違者道不虛行觀之如堵牆化之猶影響俎豆之事修矣禮樂之道興矣十室之邑期忠信以如丘一變之風聞詩書而及魯議者曰吳地裸國也崑邱海隅也舊染霸

俗未行儒風非明君以文德敷萬邦非賢宰以儒術化百里又安能遵先王之教移小國之風者哉禹偁幸忝德鄰熟聞異政爰旌茂績俾述斯文難言雖在於聖門不朽願刊於貞石時大宋雍熙四年三月十九日將仕郎守大理評事知長洲縣事王禹偁撰張九成崑山縣重修學記通直郎知平江府崑山縣事程公沂詠之文簡公之曾孫伊川先生之姪孫也紹興二十八年七月十二日作書抵余曰沂聞爲政莫先于教化教化莫先於興學吾邑有學卑陋不治甚不稱朝廷所以尊儒重道之意學門之外有社壇齋廳掩蔽於前氣象不舒沂乃移于社壇之西闢其門牆廣袤十餘文又以東隅建學外門週植槐柳增崇殿門營治齋宇氣象宏偉殿堂齋廡鼎鼎一新遇月旦則率縣官詣學請主學者分講六經與諸生環坐堂上以聽焉時知府事待制蔣公名其堂曰致道并書學榜以寵貴之嗚呼可謂盛矣又曰先生昔學于大儒其所見聞非俗儒比願以其所聞者名告於我我將有以大之余曰吾老矣久抱未疾舊學荒落顧何以副子之請雖然不可以虛辱也輒以聞於師者以告左右左右其擇焉竊嘗以謂學者當以孔子爲師以孔子爲師當學孔子之學孔子之學非爲事物合聞而章續句高自標致視四海爲無人攘臂而言曰吾仕宦當至將相吾富貴當歸故鄉吾當記三篋於渡河賦萬言於倚馬此正俗儒之學孔子之學乃不如是當

熟誦孔子若聖與仁則吾豈敢之說乎夏掬溜播洒之說孟子徐行後長者之說以求孔子之心可也是謂孔子之學若乃學如馬融如陸淳博如許敬宗文如班固如柳厚亦可矣而依聲襲而助武氏而事竇憲而附王叔文此吾儕之所羞道而孔門之罪人也詠之以爲如何如其不然當明以教我

常熟縣丹陽公祠堂記

平江府常熟縣學丹陽公祠者孔門

公記孔門諸子多東州之士獨公爲吳人而此縣有巷名子游有橋名文學相傳至今圖經又言公之故宅在縣西北而舊井存焉則今雖不復可見而公爲此縣之人蓋不誣矣然自孔子之沒以至於今千有六百餘年郡縣之學通祀先聖公雖以列得從餼食而其鄉邑乃未有能表其事而出之者慶元三年七月知縣事通直郎會稽孫應時乃始卽其學宮講堂之東偏作爲此堂以奉祠事是歲中冬長日之至躬率邑人學士大夫及其子弟奠爵擇菜以妥其靈而以書來曰願有記也熹惟三代之前帝王之興率在中土以故德行道藝之教其行於近者著而人之觀感服習以入焉者深若夫句吳之墟則在虞夏五服是爲要荒之外爰自太伯采藥荆蠻始得其民而端委以臨之然亦僅沒其身而虞仲之後相傳累世乃能有以自述於上國其俗蓋亦樸鄙而不文矣公生其間乃獨能悅周公

仲尼之道而北學於中國身通受業遂因文學以得聖人之一體豈不可謂豪傑之士哉今以論語考其語言類皆簡易踈通高暢宏達其曰本之則無者雖若見誦于子夏然要爲知有本也則其所謂文學固宜有以異乎今世之文學矣旣又考其行事則武城之政不小其邑而必以詩書禮樂爲先務其視有勇足民之效蓋有不足爲者至使聖師爲之莞爾而笑則其與之之意豈淺淺哉乃其取人則又以二事之細而得滅明之賢亦其意氣之感然有以相契者以故近世論者意其爲人必當敏於聞道而不滯于形器豈所謂南方之學得其精華者乃自古而已然也耶矧今全吳通爲畿輔文物之盛絕異曩時孫君子此又能舉千載之闕遺稽古崇德以勵其學者則武城絃歌之意於是乎在故熹喜聞其事而樂爲之書至於孔門設科之法與公之言所謂本所謂道及其所以取人者則願諸生相與勉焉以進其實使此邑之人百世而後有如公者出而又有以一洒夫媮懦憚事無廉恥而者飲食之焉是則孫君之志而亦熹之願也公之追德自唐開元始封吳侯我朝大中祥符改封丹陽公云五年六月甲申朝奉大夫致仕婺源縣開國男食邑三百戶賜紫金魚袋朱熹記

吳郡志卷四



